

FEPUARE 2017

# TE PARE TIAIRAA

E FAAITE RA I TE FAATERERAA ARII A IEHOVA



TUMU PARAU HAAPIIRAA:  
3-30 NO EPERERA 2017



HOHO'A MATAMUA:  
**ETIOPIA**

Te poro ra hoê taeae i roto i te hoê oire iti na te mou'a i ropu ia Etiopia. E faaohipa oia i te Bibilia no te haapii i e piti taata no nia i te Faatereraa arii a te Atua. E ahu te mau tane i te ahu hamanihia e te vavai

HUIRAATIRA  
**99 391 000**

FEIA PORO  
**10 083**

FEIA I TAE MAI I TE OROA  
HAAMANA'ORAA (2015)  
**25 323**

## TAPURA TUMU PARAU

**3** HEBEDOMA O TE **3-9 NO EPERERA**  
**E tupu ta lehova opuaraa!**

**9** HEBEDOMA O TE **10-16 NO EPERERA**  
**Te hoo, te hoê ô "tia roa"  
no ô mai i te Metua ra**

Mea titauhia i te mau tavini a lehova ia faatupu i te faaroo i te tusia taraehara o te Mesia. Maoti te hoo e tupu ai ta lehova i fafau no te huitaata. E faataa teie na tumu parau no te aha i titauhia 'i te hoo? Eaha ta 'na i faatupu? E mea nafea tatou e faaite ai i to tatou mauruuru no teie ô i i te here a to tatou Metua i te ra'i?

**14** HEBEDOMA O TE **17-23 NO EPERERA**  
**Te aratai ra lehova i to 'na nunaa**

**20** HEBEDOMA O TE **24-30 NO EPERERA**  
**O vai te aratai ra i to te Atua  
nunaa i teie mahana?**

A tausani matahiti i teie nei, ua faaohipa noa lehova i te mau tane no te faatere. Nafea tatou e ite papu ai e ua faaohipa lehova i teie mau tane? E mea nafea tatou e taa 'i e te faaohipa ra oia i teie mahana i te tavini haapao maitai e te paari? E faataa teie na tumu parau e toru ravea e papu ai ia tatou o vai teie mau tia a te Atua.

**27** AAMU  
**Ua ite mâua i to te Atua hamani  
maitai rahi i roto e rave rahi tupuraa**

**31** UIRAA A TE FEIA TAIO

E ere teie papai i te mea hoo. E tuhaa te reira no te hoê ohipa haapiiraa Bibilia na te ao atoa nei e turuhia ra e te mau ô horoa noa.

No te mau ô horoa noa, a hi'o i nia [www.jw.org/ty](http://www.jw.org/ty).

**THE PARE TIAIRAA**  
E FAAITE RA I TE FAATERERAA ARII A LEHOVA

Aita ana'e i faahitihia te huriraa Bibilia, no roto mai ia te mau irava i *Te Bibilia Mo'a ra* ma te tahi mau faatanoraa i te tapao o te toparaa reo.

*The Watchtower* (ISSN 0043-1087) Issue 3 February 2017 is published monthly with an additional issue published in January, March, May, July, September, and November by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 1000 Red Mills Road, Wallkill, NY 12589-3299. © 2016 Watch Tower Bible and Tract Society of Pennsylvania. Printed in Japan.

February 2017  
Vol. 138, No. 3 TAHITIAN



## E tupu ta Iehova opuaraa!

*“O ta ’u i parau ra, o ta ’u ia e faatupu; ua opuahia e au ra, e na ’u ia e rave.”—ISA. 46:11.*

MEA poto te parau i faahitihia i te omuaraa o te Bibilia, mea hohonu râ: “Hamani ihora te Atua i te ra’i e te fenua i te matamua ra.” (Gen. 1:1) Mea iti roa ta tatou i ite no nia i te mau mea ta te Atua i poiete i roto i te ao nui, e mea iti roa ta tatou i taa no nia i te reva teitei, te maramarama e te puai aratoraa. (Koh. 3:11) Ua faaite mai râ Iehova i ta ’na opuaraa no te fenua e no te taata. Ua poiete oia i te taata ma to ’na iho huru e ua hinaaro oia ia oaoa ratou i te ora i te fenua nei. (Gen. 1:26) E riro ratou ei tamarii na ’na, o ’na to ratou Metua.

<sup>2</sup> Mai te pene toru o te Genese, te haapii ra tatou e ua haafifhia ta Iehova opuaraa. (Gen. 3:1-7) Aita râ e fifi ta Iehova e ore e nehenehe e faatitiaifaro. Aita e taata e nehenehe e patoi ia ’na. (Isa. 46:10, 11; 55:11) Ia papu ia tatou e e tupu iho â ta Iehova opuaraa matamua i te taime tano!

<sup>3</sup> Mea papu, ua ite tatou eaha ta te Atua opuaraa no te

1, 2. (a) Eaha ta Iehova i faaite mai? (b) Eaha te parau fafau ta tatou e ite i roto i te Isaia 46:10, 11 e te 55:11?

3. (a) Eaha te mau haapiiraa faufaa o te tauturu mai ia taa i te poroi Bibilia? (b) No te aha tatou e hi’opoa ’i i teie mau haapiiraa? (c) Eaha te mau uiraa ta tatou e hi’opoa mai?

HIMENE: 147, 149

### E NAFAEA OUTOU IA PAHONO?

Eaha ta Iehova opuaraa no te taata?

No te aha aita ’i ta Iehova opuaraa i tupu atura?

Eaha ta Iehova i horoa ia tupu ta ’na opuaraa?



fenua e no te taata, e eaha to Iesu tiaraa i roto i tera opuaraa. E pue parau mau Bibilia faufaa roa te reira, e aita e ore e tera atoa te mau parau mau matamua ta tatou i haapii i roto i te Parau a te Atua. I teie nei, e hinaaro tatou e tauturu ia vetahi ê ia ite i teie mau haapiiraa faufaa roa. E nehenehe tatou e na reira i teie taime o te matahiti, a titau manihini ai tatou i te taata ia apiti mai i te Oroa haamana'oraa o te pohe o te Mesia. (Luka 22:19, 20) Ia haere mai ratou no teie oroa faufaa, e haapii hau atu â ratou no nia i ta te Atua opuaraa faahiahia mau. No reira, e taime maitai teie no te feruri no nia i te mau uiraa ta tatou e nehenehe e faaohipa no te faaitoito i te taata ia apiti mai. I roto i teie tumu parau, e hi'opoa mai tatou e toru uiraa: Eaha te opuaraa a te Atua no te fenua e no te taata? Eaha te fifi i tupu? No te aha maoti te tusia taraehara o Iesu e tupu ai ta te Atua opuaraa?

### EAHA TA TE ATUA POIETE I OPUA I TE OMUARAA?

4 E Atua poiete faahiahia mau o Iehova. Mea faito ore te mau mea atoa ta 'na i poiete. (Gen. 1:31; Ier. 10:12) Eaha ta tatou e haapii mai no nia i te nehenehe e te naho e itehia i roto i te mau mea i poiete-hia? Te haapii ra tatou e mea faufaa te mau mea atoa ta Iehova i poiete, mai te mau mea iti haihai roa e tae roa 'tu i te mea rarahi. Hau atu â, eaha to oe huru ia feruri oe i te tao'a tahi ora faahiahia mau o te taata, ia hi'o oe i te hoê pêpe fanau apî aore ra ia mataitai oe i te hoê toparaa

4. E nafea te mau mea i poiete-hia e faaite ai i te "hanahana o te Atua"?

mahana nehenehe mau? E faahiahia roa tatou i teie mau ohipa no te mea ua poiete Iehova ia tatou e te aravihi e ite eaha mau te mea nehenehe.—**A taio i te Salamo 19:1; 104:24.**

5 Ua taotia Iehova i te taotoaraa o te mau mea ta 'na i poiete. Ua haamau oia i te mau ture o te natura e te mau ture i te pae morare. Ua haamau oia i teie mau ture ia nehenehe te mau mea atoa i roto i te ao nui e tere maitai. (Sal. 19: 7-9) E vahi e e ohipa taa maitai to te mau mea atoa i roto i te ao nui. Ei hi'oraa, maoti te ture o te puai aratoraa e vai piri noa 'i te reva mata'i i te fenua e e ohipa atoa te reira i nia i te moana e te nanuraa o te miti. Ahani aita te puai aratoraa, eita ia e nehenehe e ora i te fenua nei. Maoti te mau taotiaraa ta Iehova i haamau i roto i te natura e itehia 'i te naho i roto i te ao nui. Te faaite ra te reira e e opuaraa ta 'na no te fenua e no te taata. I roto i ta tatou taviniraa, e nehenehe tatou e tauturu i te taata ia ite o vai te Atua poiete o teie ao nui faahiahia mau.—Apo. 4:11.

6 Te opuaraa a Iehova, ia ora te taata e a muri noa 'tu i te fenua nei. (Gen. 1:28; Sal. 37:29) E Atua aau horoa noa oia, e ua horoa oia ia Adamu raua Eva e rave rau ô faahiahia mau. (**A taio i te Iakobo 1:17.**) Ua horoa 'tu Iehova i te tiamâraa e maiti, oia atoa, te aravihi no te feruri, no te here e no te faahoia. Ua paraparau e ua haapii te Atua poiete ia Adamu e nafea ia rave i te mea maitai. Ua haapii atoa

5. Eaha ta Iehova i rave ia tere maitai te mau mea atoa ta 'na i poiete?

6, 7. Eaha te tahi mau ô ta Iehova i horoa ia Adamu raua Eva?

Adamu e nafea ia haapao ia 'na iho, te mau animara e te fenua. (Gen. 2:15-17, 19, 20) Ua horoa Iehova ia Adamu raua Eva i te mau tumu ite, ia nehenehe raua e tamata, e fafa, e hi'o, e faaroo e e hau'a i te mau mea maitatai ta 'na i pûpû atu. Ma te na reira, ua nehenehe raua e ora ma te oaoa i roto i to raua nohoraa nehenehe mau. E rave rahi ohipa anaanatae ta Adamu raua Eva i rave. E ua nehenehe raua e tamau i te haapii e te ite i te mau mea apî e a muri noa 'tu.

<sup>7</sup> Eaha te tahi atu â mau mea o tei ô atoa i roto i ta te Atua opuaraa? Maoti Iehova, ua nehenehe Adamu raua Eva e fanau mai i te mau tamarii tia roa. E fanau atoa mai ta raua tamarii i ta ratou iho tamarii a i roa 'tu ai te fenua i te taa-ta. Ua hinaaro Iehova ia here te mau metua i ta ratou tamarii, mai ta 'na i here ia Adamu raua Eva, ta 'na na tamarii mata-mua tia roa. Ua horoa oia i te huitaata i te fenua e pauroa te mau mea nehenehe mau e vai ra i nia iho. E riro teie vahi ei nohoraa no raua e eita roa 'tu te reira e tauî.—Sal. 115:16.

### EAHA TE FIFI I TUPU?

<sup>8</sup> Aita te ohipa i tupu mai ta Iehova i hinaaro. No te aha? Ua horoa Iehova ia Adamu raua Eva i te hoê ture, ia taa raua eaha te otia o to raua tiamâraa. Ua parau oia: “E amu noa oe i to te mau raau atoa o te ô nei; area i to te raau e ite ai i te maitai e te ino, eiaha oe e amu i te reira; ei te mahana e amu ai oe i te reira, e pohe ia oe.” (Gen. 2:16, 17) E ere roa 'tu teie ture i te mea fifi no raua ia taa. E ere atoa i te

8. No te aha te Atua i horoa 'i i te ture o te Genese 2:16, 17?

mea fifi ia auraro, mea rahi hoi te maa au mau i roto i te ô.

<sup>9</sup> Ua faaohipa Satani te Diabolo i te hoê ophi no te haavare ia Eva, ia ore oia ia auraro i to 'na Metua, ia Iehova. (**A taio i te Genese 3:1-5**; Apo. 12:9) Te parau e eita te mau tamarii a te Atua e faatiahia ia “amu i to te mau raau atoa o te ô,” ua faariro Satani i te reira ei haafifiraa. Mai te mea ra e te parau ra oia: ‘Te auraa ia e eita ta outou e nehenehe e rave i ta outou e hinaaro?’ I muri iho, ua parau oia ia Eva: “E ore roa orua e pohe.” E haavare tera. Ua tamata oia i te turai ia Eva ia tia-turi e e ere i te mea faufaa ia faaroo i te Atua. Ua na ô Satani: “Ua ite hoi te Atua e, ua amu ana'e orua i to reira, e araara ia to orua mata.” Te parau ra Satani e eita Iehova e hinaaro ia amu raua i te maa hotu, no te mea e horoa 'tu te reira i te hoê ite taa ê. I te pae hopea, ua haavare oia ma te parau atu: “E riro orua mai te atua ra te huru, i te ite i te maitai e te ino.”

<sup>10</sup> Mea tia ia ia faaoti Adamu raua Eva eaha te rave: e auraro anei i te Atua aore ra e faaroo i te ophi? Ua faaoti raua i te faaroo ore i te Atua. Ua patoi raua ia Iehova ei Metua no raua e ua apiti ia Satani. Raua noa 'tura i tera taime, ua ere raua i ta Iehova paruru.—Gen. 3:6-13.

<sup>11</sup> I to Adamu raua Eva ofatiraa i ta te Atua ture, erehia 'tura raua i te tiaraa taata tia roa. Ua riro atoa raua ei enemi no te Atua, no te mea aita oia e au i te

9, 10. (a) Ua pari Satani ia Iehova i te aha? (b) Eaha ta Adamu raua Eva i faaoti? (A hi'o i te hoho'a matamua.)

11. No te aha Iehova i ore ai i vaiho noa i te hara a Adamu raua Eva?

ino. E ore to 'na "mata maitai e tia ia hi'o i te ino." (Hab. 1:13) Ahani aita Iehova i rave hoê noa 'e mea no te hara a Adamu raua Eva, pauroa te mau mea ta 'na i poi-ete te fifihia. E uiui paha te mau melahi e te taata e nehenehe anei e tiaturi i ta 'na parau. Mea haapao maitai râ o Iehova i ta 'na iho mau ture aveia, e eita roa 'tu oia e ofati i te reira. (Sal. 119:142)

---

## I muri a'e i to Adamu raua Eva faarueraa ia 'na, ua rave oioi te Atua i te tahi mau faanahoraa ia fana'o faahou te huitaata i te hoê auhoaraa e o 'na

---

Noa 'tu e tiamâraa to Adamu raua Eva e maiti, aita ta raua i nehenehe e ape i te mau faahopearaa o to raua orure-hauraa ia Iehova. Ua pohe e ua ho'i raua i te repo, no reira mai raua i te raveraahia mai.—Gen. 3:19.

<sup>12</sup> I to Adamu raua Eva amuraa i te maa hotu, aita 'tura Iehova i nehenehe faahou e farii ia raua ei mero no to 'na utuafare. Ua tiavaruhia raua i rapae i te ô i Edene e aita roa 'tu raua i nehenehe faahou e ho'i i reira. (Gen. 3:23, 24) Ua vaiiho Iehova ia faaruru raua i te mau faahopearaa o ta raua faaotiraa. (**A taio i te Deuteronomi 32:4, 5.**) Aita 'tura ta raua i nehenehe faahou e pee ma te tia roa i te mau huru maitatai o

12. Eaha tei tupu no te mau tamarii a Adamu?

Iehova. Ua ere Adamu i te hoê a muri a'e faahiahia mau eiaha no 'na noa, no ta 'na atoa râ mau tamarii. Ua tutuu oia na ratou i te huru taata tia ore, te hara e te pohe. (Roma 5:12) Ua faaere o Adamu ia ratou i te ora mure ore. Aita Adamu raua Eva i fanau mai i te tamarii tia roa, aita atoa ta raua mau tamarii i fanau mai i te mau tamarii tia roa. Mai te taime a haafariu ê ai Satani ia Adamu raua Eva i te Atua, aita te Diabolo i faaea i te ohipa i nia i te taata ia na reira atoa ratou.—Ioa. 8:44.

### MAOTI TE HOO E NEHENEHE E FAATUPU I TE AUHOARAA E TE ATUA

<sup>13</sup> Ua here noa râ Iehova i te taata. Noa 'tu ua faarue Adamu raua Eva ia 'na, ua hinaaro â oia ia faatupu te huitaata i te hoê auhoaraa maitai e o 'na. E aita o 'na i hinaaro ia pohe ratou. (Pet. 2, 3:9) Ua rave oioi ia te Atua i te tahi mau faanahoraa ia fana'o faahou te huitaata i te hoê auhoaraa e o 'na. E nafea râ oia e na reira 'i ma te ore e ofati i ta 'na iho mau ture aveia? Ta tatou ia e hi'o mai.

<sup>14</sup> **A taio i te Ioane 3:16.** No e rave rahi ta tatou e titau manihini i te Oroa haamana'oraa, ua mau aau ia ratou teie irava. E nafea râ te ora mure ore e noaa 'i maoti te tusia o Iesu? E nehenehe tatou e tauturu i te taata ia ite i te pahonora o teie uiraa ia titau manihini tatou ia ratou i te Oroa haamana'oraa, ia parahi ratou i pihaiho ia tatou i te Oroa e ia ho'i faahou tatou e farerei ia ratou i

13. Eaha ta Iehova e hinaaro no te huitaata?

14. (a) Ia au i te Ioane 3:16, eaha ta te Atua i rave no te faaora i te taata i te hara e te pohe? (b) No nia i teihea uiraa tatou e nehenehe ai e aparau e te taata?

muri a'e. Hau atu â ratou i te ite eaha te hoo, hau atu â ratou i te taa to Iehova here no te taata e to 'na paari. Eaha te mau mana'o faufaa no nia i te hoo ta tatou e nehenehe e faaite ia ratou?

**15 Ua pûpû Iehova i te hoê taata tia roa o te nehenehe e horoa i to 'na ora ei hoo.** Mea tia ia vai taiva ore teie taata tia roa ia Iehova e ia ineine oia i te horoa i to 'na ora no te taata. (Roma 5:17-19) Ua tonono Iehova ia Iesu, ta 'na i poieta na mua roa, mai te ra'i mai i te fenua nei. (Ioa. 1:14) Ua riro mai ia Iesu ei taata tia roa, mai ia Adamu na mua 'e. Taa ê atu râ ia Adamu, ua pee Iesu i te mau ture aveia a Iehova mai tei titauhia i te hoê taata tia roa. I mua i te mau tamataraa u'ana roa 'e, aita roa 'tu oia i ofati i ta te Atua mau ture.

**16 Ma te pohe ei taata tia roa, ua nehenehe Iesu e faaora i te taata i te hara e te pohe.** Ua tuea maite oia ia Adamu i te omuaraa. E taata tia roa o Iesu, tei auraro e tei ore i taiva i te Atua. (Tim. 1, 2:6) Ua pohe oia no tatou, e maoti to 'na tusia i nehenehe ai te mau tane, vahine e tamarii e ora e a muri noa 'tu. (Mat. 20:28) Na roto i te hoo e tupu ai ta te Atua opuaraa.—Kor. 2, 1:19, 20.

### **UA HOROA IEHOVA I TE RAVEA IA HO'I MAI IA 'NA RA**

**17** Mea faito ore te hoo ta Iehova i pûpû. (Pet. 1, 1:19) No to 'na here rahi ia tatou i ineine ai oia i te horoa i ta 'na Tamaiti here ia pohe oia no tatou. (Ioa. 1, 4:9, 10) E nehenehe e parau e ua riro

15. E nafea Iesu i taa ê ai ia Adamu?

16. No te aha e ô faahiahia mau te hoo?

17. Eaha ta te hoo e faatupu?



## **E tamau ana'e i te imi i te feia e farii ia outou**

I TE mau matahiti atoa, e pûpû te mau Ite no Iehova i te titau-manihini-raa i te Oroa haamana'oraa na e rave rahi mirioni taata na te ao nei. I te matahiti i mairi, ua piahia piri atu i te 440 000 000 titau-manihini-raa na roto hau atu i te 530 reo. Te vai ra â ta oe titau-manihini-raa no teie matahiti, o ta oe e nehenehe e opere atu i te taata hou te Oroa haamana'oraa? Peneia'e e tauturu hoê o teie mau titau-manihini-raa i te hoê taata ia apiti atu.—Mat. 10:11.

Iesu, eiaha râ Adamu, ei metua no tatou. (Kor. 1, 15:45) Te horoa mai ra Iesu i te ravea eiaha noa ia fana'ô tatou i te ora mure ore, oia atoa râ ia ho'i tatou i roto i to te Atua utuafare i te hoê mahana. Na roto i te hoo e riro ai te huitaata ei feia tia roa e e farii faahou ai Iehova ia ratou i roto i to 'na utuafare ma te ore e ofati i ta 'na iho mau ture. A feruri na i te oaoa ia riro mai te feia taiva ore ia Iehova ei taata tia roa! I reira ia to te ra'i e to te fenua e tahoê ai ei utuafare fetii. E riro tatou pauroa ei tamarii a te Atua.—Roma 8:21.

<sup>18</sup> Noa 'tu ua patoi to tatou na metua matamua ia Iehova, aita oia i faaea i te here i te taata e ua horoa mai oia i te hoo. E noa 'tu e taata tia ore tatou, eita ta Satani e nehenehe e tapea ia tatou ia taiva ore ia Iehova. Na roto i te hoo, e tauturu

18. I teihea taime e riro ai Iehova "i nia iho i te mau mea atoa"?

mai Iehova ia riro tatou ei taata parautia. A feruri na i te oraraa ia fana'ô te taata atoa "o te ite i te Tamaiti e te faaroo ia 'na" i te ora mure ore! (Ioa. 6:40) E faatupu to tatou Metua i te here e te paari i ta 'na opuaraa e e tauturu oia i te taata ia riro mai ei taata tia roa. I reira Iehova e riro roa 'i "i nia iho i te mau mea atoa." —Kor. 1, 15:28.

<sup>19</sup> Ia turai mai to tatou mauruuru no te hoo ia faaite ia vetahi ê no nia i teie ô faito ore. Mea tia ia ite te taata e na roto i te hoo, te pûpû ra Iehova ma te here i te ora mure ore na te huitaata. Ua hau atu â râ ta te hoo e rave. E faaafaro te reira i ta Satani i parau i roto i te ô i Edene. E hi'opoa tatou i te reira i roto i to muri mai tumu parau.

19. (a) E turai mai to tatou mauruuru no te hoo ia aha? (A hi'o i te tumu parau tarenihia "E tamau ana'e i te imi i te feia e farii ia outou.") (b) Eaha ta tatou e hi'opoa mai i roto i to muri mai tumu parau?

## NO TE TAA MAITAI ATU Â I TEIE TUMU PARAU

### Te mau ture morare a Iehova:

E mau ture aveia o te hae-rea teie, ta Iehova i haamau no te mau mea atoa ta 'na i poiete. O Iehova ana'e te nehenehe e horoa mai i te mau ture tia roa

### Tiamâraa e maiti:

E aravihi teie o ta Iehova i horoa mai no te feruri eaha te nehenehe e rave, te mau faahopearaa, oia atoa, te aravihi no te maiti. Ia maiti tatou e ora ia au i ta 'na mau ture, e faaite ia te reira e te hinaaro ra tatou e riro mai ei tamarii a te Atua





## Te hoo, te hoê ô “tia roa” no ǒ mai i te Metua ra

*“Te mau mea maitatai i ho-mai-hia mai, e te mau mea tia roa e maitai roa ’i, . . . mai nia mai ia i te Metua.”—IAK. 1:17.*

MAOTI te tusia taraehara o Iesu Mesia e nehenehe ai e ite e rave rahi haamaitairaa. Ei hi’oraa, maoti te faanahoraa o te hoo e nehenehe ai te mau tamarii a Adamu o tei au i te parautia e riro mai ei mero o to te Atua utuafare. E nehenehe atoa tatou e ora ma te oaoa e a muri noa ’tu. Hau atu â i te reira, ua tuatihia te hoo i te tahi mau mea faufaa no te taatoaraa i te ra’i e i te fenua nei.—Heb. 1:8, 9.

<sup>2</sup> Fatata piti matahiti hou Iesu a pohe ai, ua haapii oia i ta ’na mau pīpī ia pure: “E to matou Metua i te ao ra, ia raa to oe **i’oa**. Ia tae to oe ra **basileia**. Ia haapaohia to oe **hinaaro** i te fenua nei mai tei te ra’i atoa na.” (Luka 11:2) E hi’opoa mai tatou e nafea te hoo i tuatihia ’i i te haamo’araa i to Iehova i’oa, te aratairaa a te Faatereraa arii a te Atua e i te raveraa i to te Atua hinaaro.

1. Eaha te mau ohipa maitatai ta te hoo e faatupu?
2. (a) Eaha te mau mea faufaa i te ra’i e i te fenua ta Iesu i faahiti i roto i ta ’na pure? (A hi’o i te hoho’a matamua.) (b) Eaha ta tatou e hi’opoa mai i roto i teie tumu parau?

HIMENE: 148, 109

### E NAFAE TE HOO . . .

e tauturu ai ia haamo’a i to Iehova i’oa?

e hopoi mai ai i te mau haamaitairaa i raro a’e i te aratairaa a te Faatereraa a te Atua?

e tauturu ai ia tupu ta te Atua opuaraa?

## “IA RAA TO OE I’OA”

<sup>3</sup> Na mua roa, ua pure Iesu ia haamo’ahia to Iehova i’oa aore ra ia faarirohia ei mea mo’a. E tano to Iehova i’oa ia Iehova iho e to ’na huru. I roto i te ao nui, o ’na te Atua parau-tia e te puai roa ’e. Ua pii atoa Iesu ia ’na te “Metua Mo’a ra.” (Ioa. 17:11) No te mea e Atua mo’a Iehova, te mau mea atoa ta ’na e rave e te mau ture atoa ta ’na e haamau, mea mo’a ana’e. I roto râ i te ô i Edene, ua uiui Satani no nia i to te Atua tiaraa e haamau i te mau ture aveia na te taata. Ua haavare oia no nia ia Iehova e ua faaino i to te Atua i’oa, aore ra roo.—Gen. 3:1-5.

<sup>4</sup> I te tahi a’e pae, ua haafaufaa mau Iesu i to Iehova i’oa e ua rave oia i te mau mea atoa no te haamo’a i te reira. (Ioa. 17:25, 26) E nafea? Ma to ’na haerea e ta ’na haapiiraa, ua tauturu Iesu ia vetahi ê ia taa e mea tia ta Iehova mau ture aveia e te mau mea atoa ta ’na e titau mai, no to tatou iho ia maitai. **(A taio i te Salamo 40:8-10.)** Noa ’tu o Satani te tumu i haamauuihia ’i e i pohe ai Iesu, aita oia i taiva. Ua haapapu oia e e nehenehe te hoê taata tia roa e auraro maite ia Iehova.

<sup>5</sup> E nafea tatou e faaite ai e te haafaufaa ra tatou i to Iehova i’oa? Ma to tatou haerea. Te titau mai ra Iehova ia mo’a tatou. **(A taio i te Petero 1, 1:15, 16.)** Te auraa, o ’na ana’e ta tatou e haamori e e auraro ma te aau atoa. Noa ’tu e hamani-ino-hia tatou, e tutava tatou i te ora mai ta Ieho-

3. (a) No te aha to Iehova i’oa e tano ai ia ’na? (b) Mea nafea Satani i te faainoraa i to Iehova i’oa?

4. Mea nafea Iesu i te faariroraa i to te Atua i’oa ei mea mo’a?

5. E nafea tatou e faariro ai i to Iehova i’oa ei mea mo’a?

va i haapii ia tatou. Ma te ora ia au i te mau ture aveia a Iehova, te faahanahana ra ia tatou i to ’na i’oa. (Mat. 5:14-16) E haapapu tatou e mea maitai ta ’na mau ture e e parau haavare ana’e ta Satani. Mea tia ore tatou, e hape iho â tatou. Ia hape noa ’tu râ tatou, e tatarahapa e e tutava tatou i te faaea i te rave i te mau mea o te ore e faahanahana i to Iehova i’oa.—Sal. 79:9.

<sup>6</sup> E feia faatavaihia aore ra e “mamoe ê atu” tatou, e faaore Iehova i ta tatou mau hara ia faatupu tatou i te faaroo i te hoo. E farii oia i te mau taata o tei pûpû ia ratou iho no ’na ei feia haamori no ’na. Te faariro nei Iehova i te mau Kerisetiano faatavaihia ei feia parau-tia, a riro atu ai ratou ei tamaiti na ’na, oia atoa no te mau “mamoe ê atu” o te riro ei hoa no ’na. (Ioa. 10:16; Roma 5:1, 2; Iak. 2:21-25) No reira, i teie nei â, na roto i te hoo e nehenehe ai tatou e faatupu i te auhoaraa maitai e to tatou Metua e e haamo’a i to ’na i’oa.

## “IA TAE TO OE RA BASILEIA”

<sup>7</sup> I roto i te Pure a te Fatu, ua parau Iesu: “Ia tae to oe ra basileia.” E nafea te hoo e tuati ai i te Basileia, aore ra Faatereraa arii a te Atua? O Iesu e e 144 000 taata maitihia to roto i ta te Atua Faatereraa. Maoti te hoo e nehenehe ai teie mau taata e faatia-faahou-hia i te ra’i. (Apo. 5:9, 10; 14:1) E riro ratou ei arii e ei tahu’a, e e faatere ratou i te fenua i pihaiho ia Iesu hoê tausani matahiti. I tera roaraa, e faaohipa Iehova i te Faatereraa arii ia riro te fenua ei paradaiso, e te taata ei taata tia

6. No te aha Iehova e faariro ai ia tatou ei taata parau-tia noa ’tu to tatou huru tia ore?

7. Maoti te hoo, eaha te mau haamaitairaa ta te taata e ite?

roa. I reira ta Iehova mau tavini i te ra'i e i te fenua nei e riro ai ei utuafare fetii. (Apo. 5:13; 20:6) E haamou Iesu ia Satani, a faaore atu ai i te mau fifi atoa ta te Diabolo i faatupu.—Gen. 3:15.

<sup>8</sup> Ua tauturu Iesu i ta 'na mau pīpī ia taa i te faufaaraa o ta te Atua Faatereraa arii. Mea nafea? I muri noa 'e i to 'na bapetizoraa, ua haamata Iesu i te poro “i te parau maitai o te basileia o te Atua” i te mau vahi atoa ta 'na i haere. (Luka 4:43) Ua parau atoa oia i ta 'na mau pīpī ia riro ei ite no 'na “e tae noa 'tu i te hopea o te fenua.” (Ohi. 1:6-8) I teie mahana, na roto i te pororaa o te Faatereraa arii e nehenehe ai te taata e haapii no nia i te hoo e e riro mai ei tino huiraaatira no te Faatereraa arii a te Atua. E faaite tatou i te taiva ore i te Faatereraa arii ma te turu i tei faatavaihia i roto i te ohipa pororaa i te parau apī oaoa na te ao nei.—Mat. 24:14; 25:40.

### “IA HAAPAOHIA TO OE HINAARO”

<sup>9</sup> Eaha ta Iesu i hinaaro e parau a na ô ai oia: “Ia haapaohia to oe hinaaro”? Ia parau Iehova e e tupu te tahi ohipa, e tupu iho â te reira. (Isa. 55:11) Aita te orure hau a Satani e nehenehe e tapea ia Iehova. Eaha ta Iehova i opua na no te fenua? Ua hinaaro oia ia i te fenua i te mau tamarii tia roa a Adamu raua Eva. (Gen. 1:28) Ahani Adamu raua Eva i pohe ma te ore e fanau, eita ia te opuaraa a te Atua e faa'i te fenua e tupu. No reira ia Iehova i vaiiho ai ia raua ia fanau mai i te tamarii.

8. (a) Mea nafea Iesu i tauturu ai i ta 'na mau pīpī ia taa e mea faufaa te Faatereraa arii a te Atua? (b) E nafea tatou e turu ai i te Faatereraa arii i teie mahana?

9. No te aha e nehenehe ai e tiaturi e e faatupu iho â Iehova i ta 'na opuaraa no te taata?

Maoti te hoo e nehenehe ai te taata o te faatupu i te faaroo e riro mai ei taata tia roa, a ora 'tu ai e a muri noa 'tu. Mea here na Iehova te mau taata e te hinaaro nei oia ia noaa ia tatou te oraraa ta 'na i opua na no tatou.

<sup>10</sup> E no te mau miria taata tei pohe ma te ore e ite o vai Iehova? E hinaaro Iehova ia ora te taata. E faatia-faahou-mai ia oia i tei pohe. Maoti te hoo e nehenehe ai ratou e ora faahou mai. I muri iho, e nehenehe ratou e haapii no nia ia Iehova e e ora e a muri noa 'tu. (Ohi. 24:15) O Iehova te Tumu o te ora. Ia horoa faahou Iehova i te ora i tei pohe, e riro oia ei Metua no ratou. (Sal. 36:9) I roto i te pure a te Fatu, ua parau Iesu o “to matou **Metua**” i te ra'i o Iehova. (Mat. 6:9) Ua horoa Iehova i te hoê tuhaa faufaa mau ia Iesu no nia i te parau o te faatia-faahou-raa i tei pohe. Ua parau Iesu: “Tei ia 'u te tia-faahou-raa e te ora.”—Ioa. 6:40, 44; 11:25.

<sup>11</sup> Te titau manihini nei Iehova ia tatou pauroa ia riro ei mero o to 'na utuafare. Ua parau atoa Iesu: “O **tei** haapao . . . i te hinaaro o te Atua ra, o to 'u ia taeae, o to 'u ia tuahine, o to 'u . . . ia metua vahine.” (Mar. 3:35) Tera te hinaaro o te Atua: ia riro te taata no te mau nunaa, fenua e reo atoa ei feia haamori no 'na. Te parauhia ra e “e feia rahi roa” ratou, “e ore roa e pau ia taio.” Te faatupu nei ratou i te faaroo i te hoo e te hinaaro nei ratou e auraro i te Atua. Te arue nei ratou ia 'na ma te parau: “Tei to tatou Atua te ora, tei parahi i nia iho i te terono ra, e tei te Arenio.”—Apo. 7:9, 10.

10. E nafea te feia o tei pohe e faufaahia 'i i te hoo?

11. Eaha to Iehova hinaaro no te “feia rahi roa”?



E nafea tatou e faaite ai i to tatou mauruuru no te hoo?  
(A hi'o i te paratarafa 13, 14)



<sup>12</sup> Mea rahi ta tatou i haapii mai no nia ia Iehova e ta 'na opuaraa no te huitaata i roto i ta Iesu pure. A tahi, mea tia ia tutava tatou no te haamo'a i to Iehova i'oa e no te faahanahana ia 'na. (Isa. 8:13) Te faahanahana atoa ra to Iesu tusia tarahara, te ravea e ora 'i tatou, i te i'oa o te Atua. Inaha, o "Iehova te faaora" te auraa o to Iesu i'oa. Te piti, e faahipia Iehova i ta 'na Faatereraa no te hopoi mai i te mau maitai

12. I roto i te pure a Iesu, eaha ta tatou e haapii mai no nia i ta Iehova opuaraa no te huitaata?

o te hoo no te feia auraro. E te toru, ua papu ia tatou e aita e mea e nehenehe e ta-pea i to Iehova hinaaro ia tupu.—Sal. 135:6; Isa. 46:9, 10.

### A FAAITE IA IEHOVA I TO MAURUURU NO TE HOO

<sup>13</sup> Hoê ravea faufaa no te faaite i to tatou mauruuru no te hoo, o te pûpûraa ia i to tatou oraraa ia Iehova e i te bapetizoraa ia tatou. Ma te na reira, te faatupu ra ia tatou i te faaroo i te hoo e te faaite atoa ra e "no Iehova tatou." (Roma 14:8) Ia bapetizo tatou, e ani tatou ia Iehova ia horoa mai i "te aau hapa ore," oia hoi, te mana'o haava maitai. (Pet. 1, 3:21) Te pahono ra Iehova ma te horoaraa i te mau maitai o te hoo na tatou. E ua papu roa ia tatou e e horoa mai oia pauroa te mau mea ta 'na i fafau. —Roma 8:32.

<sup>14</sup> Te mau mea atoa ta Iehova e rave, ua niuhia ia i nia i te here. Te hinaaro ra oia ia pee te feia haamori ia 'na i to 'na hi'oraa e ia here ratou te tahi i te tahi. (Ioa. 1, 4:8-11) Ia here tatou i te taata, te faaite papu ra ia tatou e te hinaaro ra tatou e riro "ei tamarii na to [tatou] Metua i te ao ra," aore ra ra'i. (Mat. 5:43-48) Na faaueraa rahi roa 'e e piti, teie ia: a tahi, ia here ia Iehova, e te piti, ia here ia vetahi ê. (Mat. 22:37-40) Te haapiiraa i te taata i te parau apî oaoa o te Faatereraa arii a te Atua, hoê ia ravea teie no te faaite i to tatou here ia ratou. Mai te peu e auraro tatou i te faaueraa a Iehova ia here ia vetahi ê, i to tatou mau taeae iho â râ, e "maitai roa" to tatou here no 'na.—Ioa. 1, 4: 12, 20.

13. No te aha e bapetizo ai tatou?

14. No te aha Iehova e faaue mai ai ia here ia vetahi ê?

## E HOPOI MAI TE HOO I TE MAU HAAMAITAIRAA NO Ǿ MAI IA IEHOVA

<sup>15</sup> Te haapapu mai ra Iehova e no te mea ua faatupu tatou i te faaroo i te hoo, ua “paraihia” ia ta tatou mau hara. E nehenehe oia e faaore roa i ta tatou mau hara. **(A taio i te Ohipa 3:19-21.)** Mai ta tatou i hi’opoa mai nei, maoti te hoo e nehenehe ai Iehova e rave i te tahi mau taata ei tamaiti na ’na i te ra’i. O te mau Kerisetiano faatavaihia ia. (Roma 8:15-17) Te titau manihini ra oia i te mau “mamoe ê atu” ia riro ei mero o to ’na utuafare i te fenua nei. E riro ratou ei taata tia roa e, i muri a’e, e tamata-faahou-hia ratou. Mai te peu e vai taiva ore ratou ia Iehova, e riro atoa mai ratou ei tamarii na ’na. (Roma 8:20, 21; Apo. 20:7-9) E here noa iho â Iehova pau-roa ta ’na mau tamarii. E tamau te hoo i te hopoi mai i te mau haamaitairaa e a muri noa ’tu. (Heb. 9:12) Ua horoa mai Iehova i teie ô faahiahia e eita hoê noa ’e taata e nehenehe e tatara i te reira.

<sup>16</sup> Ia tatarahapa tatou no ta tatou mau

15. (a) Eaha te mau haamaitairaa a Iehova ta tatou e fana’o nei i teie nei â? (b) Eaha te mau haamaitairaa ta tatou e fana’o a muri a’e?

16. E nafea te hoo e tauturu ai ia tatou ia tiamâ?

hara, aita e mea ta te Diabolo e nehenehe e rave no te tapea ia tatou ia riro mai ei mero o to Iehova utuafare. “Hoê roa” tai-me Iesu te poheraa. Ua pee te hoo i te au-fauhia. (Heb. 9:24-26) Ua tutuu mai Adamu i te pohe, area te tusia o Iesu, e hopoi mai ia i te ora mure ore. E nehenehe te hoo e faatiamâ ia tatou i te ao a Satani e i te mâtâ’u i te pohe.—Heb. 2:14, 15.

<sup>17</sup> E tupu iho â te mau parau ta te Atua i fafau. Mai te mau ture ta Iehova i tuu i roto i te natura, o te ore e tau, eita roa ’tu Iehova e tau. E eita roa ’tu oia e haavare ia tatou. (Mal. 3:6) E ere noa te ora ta Iehova e horoa mai, to ’na here atoa râ. “Ua ite hoi tatou, e ua faaroo tatou, i to te Atua aroha ia tatou nei. E aroha te Atua.” (Ioa. 1, 4:16) E tupu iho â ta ’na i fafau. Fatata te fenua i te riro mai ei paradaiso nehenehe mau. E pee te mau taata atoa i to Iehova hi’oraa e e here ratou te tahi i te tahi. I reira ia ta ’na mau tavini i te ra’i e i te fenua nei e parau ai: “O te arue, e te hanahana, e te paari, e te haamaitai, e te tura, e te mana, e te puai, ei to tatou Atua ia e a muri noa ’tu. Amene.”—Apo. 7:12.

17. Eaha te auraa no oe te here o Iehova?

## NO TE TAA MAITAI ATU Â I TEIE TUMU PARAU

### E riro ei mero no te utuafare fetii o Iehova:

O Iehova to tatou Metua no te mea na ’na i poiete ia tatou. A amu ai Adamu raua Eva i te maa opanihia, ua patoi raua ia Iehova ei Metua no raua. No to ’na here ia tatou, ua rave Iehova i te mau faanahoraa ia riro te taata ei mero o to ’na utuafare ma te horoa i te hoo

### Ia mo’a tatou:

Mea tia ia haamori tatou ia Iehova ana’e e ia auraro ia ’na ma to tatou aau atoa. Noa ’tu e taata tia ore tatou, e nehenehe â tatou e pee i te mau ture aveia mo’a a Iehova ia farii tatou i te hoo





## Te aratai ra Iehova i to 'na nunaa

*“Na Iehova e aratai tamau ia oe.”—ISA. 58:11.*

HIMENE: 152, 22

### E NAFAEA OUTOU IA FAATAA?

Mea nafea te mau aratai o to te Atua nunaa i tahito ra, e Iesu Mesia . . .

i te fana'oraa i te puai o te varua mo'a?

i te tautururaahia e te mau melahi?

i te aratairaahia e te Parau a te Atua?

E PINEPINE te taata i te ani i te mau Ite no Iehova “O vai to outou aratai?” E rave rahi hoi haapaoraa na te hoê tane aore ra vahine e aratai ra. E oaoa roa râ tatou i te parau e e ere to tatou Aratai i te hoê taata tia ore. O Iesu Mesia râ to tatou Aratai. E te auraro nei oia i to 'na Metua e Aratai, Iehova.—Mat. 23:10.

<sup>2</sup> Te vai atoa ra te hoê pūpū tane pihia “te tavini haapao maitai e te paari,” o te aratai i to te Atua nunaa i te fenua nei i teie mahana. (Mat. 24:45) E nafea râ tatou e ite ai e na Iehova e aratai mau ra ia tatou maoti ta 'na Tamaiti? E hi'opoa mai tatou e toru tumu no te aha e nehenehe ai e tiaturi i te reira. E noa 'tu ua faahipa Iehova i te tahi mau taata no te aratai i to 'na nunaa, e papu roa ia tatou e mai te tau mai â e tae roa mai i teie mahana, o Iehova noa iho â te Aratai mau o to 'na nunaa.—Isa. 58:11.

### UA HOROA TE VARUA MO'A I TE PUAI IA RATOU

<sup>3</sup> Ua horoa te varua mo'a i te puai i te mau tia a te Atua.

1, 2. (a) E nafea te mau Ite no Iehova i taa ê ai i te tahi atu mau haapaoraa? (b) Eaha ta tatou e haapii mai i roto i teie tumu parau e i to muri mai?

3. Na te aha i horoa i te puai ia Mose no te aratai ia Iseraela?

Ua maiti te Atua ia Mose no te aratai i te mau Iseraela. Eaha tei tauturu ia 'na ia haapao i ta 'na hopoia faufaa mau? Ua horoa Iehova i to 'na varua mo'a ia Mose. (**A taio i te Isaia 63:11-14.**) O Iehova iho â ia tei aratai i to 'na nunaa, no te mea na to 'na varua mo'a i tauturu ia Mose.

<sup>4</sup> Ua nehenehe anei te taata e ite e ua fana'o Mose i te varua o te Atua? E! Ua horoa te varua mo'a o Iehova ia Mose te aravihi no te faatupu i te mau semeio e no te faaite i to te Atua i'oa ia Pharao, te faatere puai no Aiphiti. (Exo. 7:1-3) Ua tauturu atoa te varua mo'a ia Mose ia riro mai ei aratai i te here e te faaoromai. Mea taa ê roa oia i te mau aratai etaeta e te miimii o te tahi atu mau fenua! (Exo. 5:2, 6-9) Mea papu, ua maiti Iehova ia Mose ei aratai no to 'Na nunaa.

<sup>5</sup> No te aratai i to 'na nunaa, ua horoa atoa Iehova i te varua mo'a ia vai? Te parau ra te Bibilia: "Î a'era Iosua a Nuna i te varua paari." (Deut. 34:9) "Ua haere mai . . . te [v]arua o Iehova i nia ia Gideon." (Tav. 6:34) E ua tae mai "te [v]arua o Iehova . . . i nia ia Davida." (Sam. 1, 16:13) Ua tiaturi te feia atoa e e tauturu te varua o te Atua ia ratou ia rave i te mau mea atoa ta ratou i ore i nehenehe e rave ma to ratou iho puai. (Ios. 11:16, 17; Tav. 7:7, 22; Sam. 1, 17:37, 50) Mea papu, na Iehova i horoa ia ratou te puai no te rave i te mau mea faahiahia mau, o 'na ana'e ia te tano ia aruehia.

<sup>6</sup> Eaha tei titauhia i te mau Iseraela ia rave a ite ai ratou e ua horoa te varua mo'a

4. Na te aha i haapapu e ua fana'o Mose i te varua o te Atua? (A hi'o i te hoho'a matamua.)

5. No te aratai i to 'na nunaa, ua horoa atoa Iehova i te varua mo'a ia vai?

6. No te aha te Atua i hinaaro ai ia faatura to 'na nunaa i te mau aratai no Iseraela?

o te Atua i te puai ia Mose, Iosua, Gideon e Davida? Ia faatura te mau Iseraela ia ratou. A amuamu noa 'i te nunaa ia Mose, a tapao na eaha ta Iehova i parau: "Afea . . . teie nei feia e faaea 'i i te faati'oti'oo [aore ra faatura ore] mai ia 'u?" (Num. 14:2, 11)

---

## Ia auraro te nunaa o te Atua ia Mose, Iosua, Gideon e Davida, te pee ra ia ratou ia Iehova ei Aratai no ratou

---

Mea papu, ua maiti **Iehova** i teie mau tane no te aratai i to 'na nunaa. Ia auraro te nunaa i taua mau tane ra, ua pee ia ratou ia Iehova ei Aratai no ratou.

### UA TAUTURU TE MAU MELAHI IA RATOU

<sup>7</sup> Ua tauturu te tahi mau melahi i te mau tia a te Atua. (**A taio i te Hebera 1: 7, 14.**) Ua faaohipa te Atua i te tahi mau melahi no te aratai ia Mose. A tahi, e melahi tei "fa mai ia 'na i roto i te pu aihere ra" e ua horoa oia ia 'na te hopoia e faatia-mâ mai i te mau Iseraela e e aratai ia ratou. (Ohi. 7:35) Te piti, ua faaohipa te Atua i te tahi mau melahi no te horoa i te ture ia Mose no te haapii i te mau Iseraela. (Gal. 3:19) Te toru, ua parau Iehova ia 'na: "E aratai i te mau taata i te vahi i parauhia 'tu e au ia oe ra; inaha, e na mua tau melahi ia oe." (Exo. 32:34) Aita te Bibilia i parau e ua ite te mau Iseraela i te hoê melahi i te raveraa i tera mau mea. Tera râ, ma te huru

7. Mea nafea te tahi mau melahi i te tautururaa ia Mose?

haapiiraa e aratairaa a Mose i te nunaa, papu maitai e ua tauturu iho â te mau melahi ia 'na.

<sup>8</sup> O vai atoa ta te mau melahi i tauturu? Te parau ra te Bibilia e ua tauturu te “raa-tira no te nuu a Iehova,” te hoê melahi, ia Iosua ia upootia mai i nia i to Kanaana. (Ios. 5:13-15; 6:2, 21) I muri a'e, a aratai ai te arii Hezekia i te nunaa o te Atua, ua opua te nuu rahi no Asura e haamou ia Ierusalem. I te hoê po, “haere ihora te hoê melahi a Iehova” e haapohe ihora “hoê hanere e vau ahuru ma pae i te tausani” tane. —Arii 2, 19:35.

<sup>9</sup> Mea tia roa te mau melahi. Area te mau tane ta ratou i tauturu, e ere ia. Ei hi'oraa, i te hoê taime aita Mose i faahanahana ia Iehova. (Num. 20:12) Aita Iosua i ani i te Atua eaha te rave a hinaaro ai to Gibeona e rave i te hoê faaauraa e o 'na. (Ios. 9:14, 15) I te hoê taime, ua riro mai Hezekia ei taata teoteo. (Par. 2, 32:25, 26) Noa 'tu e taata tia ore ratou, ua titauhia ia pee te mau Iseraela i to ratou aratai. Ua nehe-nehe te mau Iseraela e ite e te faahinga ra Iehova i te mau melahi no te turu i teie mau tane. Mea papu, o Iehova iho â tei aratai i to 'na nunaa.

## UA ARATAI TE PARAU A TE ATUA IA RATOU

<sup>10</sup> **Ua aratai te Parau a te Atua i te mau tia a Iehova.** Ua faahiti te Bibilia i te ture horoahia ia Iseraela ei “ture a Mose.” (Arii 1, 2:3) Tera râ, te haapapu ra te Bibilia e na Iehova i horoa i te ture a

8. Mea nafea te mau melahi i te tautururaa ia Iosua e ia Hezekia?

9. Noa 'tu e taata tia ore te mau tia a te Atua, eaha tei titauhia ia rave te mau Iseraela?

10. Mea nafea to Mose aratairaahia e te Ture a te Atua?

Mose ia Iseraela. Ua titau-atoa-hia ia auraro Mose i te reira. (Par. 2, 34:14) Ei hi'oraa, i muri a'e i to Iehova parauraa ia 'na e nafea ia patu i te sekene, “na reira 'tura . . . Mose; te mau mea atoa ta Iehova i parau mai ia 'na ra, o ta 'na ia i rave.” —Exo. 40:1-16.

<sup>11</sup> Te vai ra ia Iosua ra hoê tuhaa o te Parau a te Atua a riro ai oia ei aratai e ua parau Iehova ia 'na: “Ia haamana'o maite oe i te reira i te rui e te ao, ia haapao hua oe i tei papai-atoa-hia i roto ra.” (Ios. 1:8) Ua titau-atoa-hia i te mau arii o tei faatere i muri a'e i te nunaa o te Atua ia taio i te ture a Mose i te mau mahana atoa, ia papai i te reira e ia auraro “i te mau parau atoa o teie nei ture, e teie nei mau haapao-raa ia ravehia.”—**A taio i te Deuteronomi 17:18-20.**

<sup>12</sup> Mea nafea te Parau a te Atua i te ohiparaa i nia i te mau aratai? A feruri na i te hi'oraa o te arii Iosia. I muri a'e a itehia mai ai te ture a Mose, ua haamata te papai parau a Iosia i te taio i te reira ia 'na.\* “Ite a'era te arii i taua parau ra i roto i te buka ture ra, ua hahae ihora i to 'na ahu.” Turai atura te Parau a te Atua ia Iosia ia faaore i te mau idolo atoa na te fenua e ua rave i te mau faanahoraa no te Oroa Pasa rahi roa 'e aita i tupu a'enei. (Arii 2, 22:11; 23:1-23) No te mea ua pee Iosia e te tahi atu mau aratai haapao maitai i te Parau a te Atua, ua ineine ia ratou i te faatano i te aratairaa ta ratou i horoa i te nunaa o te Atua. Ua tauturu tera mau tauraa i te nunaa o te Atua ia auraro ia 'Na.

\* Teie paha te mau parau tumu papaihia e Mose.

11, 12. (a) Ua titauhia ia Iosua e te mau arii o tei faatere i te nunaa o te Atua ia aha? (b) Mea nafea te Parau a te Atua i te ohiparaa i nia i te mau aratai?

<sup>13</sup> E paari taotiahia to te mau aratai o te tahi atu mau nunaa. Ei hi'oraa, ua rave te mau aratai no Kanaana e to ratou nunaa i te mau ohipa iino, mai te taоторaa i te fetii piri, te peu mahu, te raveraa i te mau peu faufau e te animara, te pûpûraa i te tamarii ei tusia e te haamoriraa idolo. (Lev. 18:6, 21-25) No te parau o te viivii ore, mea taa ê atoa te mau ture a te mau aratai o Babulonia e o Aiphiti i ta te nunaa o te Atua. (Num. 19:13) Ua nehenehe râ te nunaa o te Atua e ite mea nafea to ratou mau aratai taiva ore i faaitoito ai ia ratou ia vai mâ ta ratou haamoriraa, ia vai mâ ratou e ia ape i te mau peu taоторaa viivii. Mea papu, na Iehova i aratai ia ratou.

<sup>14</sup> E ere pauroa te mau arii aratai i te nunaa o te Atua tei pee i ta te Atua mau faaueraa. Ua patoi tera mau arii taiva i te pee i te aratairaa a te varua mo'a o te Atua, a ta 'na mau melahi e a ta 'na Parau. I roto i te tahi mau tupuraa, ua a'o aore ra ua mono Iehova i tera mau aratai. (Sam. 1, 13: 13, 14) I muri a'e, ua faatoroa Iehova i te hoê aratai tia roa.

### UA FAATOROA IEHOVA I TE HOÊ ARATAI TIA ROA

<sup>15</sup> E rave rahi hanere matahiti, ua fafau Iehova e e faatoroa oia i te hoê aratai tia roa no to 'na nunaa. Ei hi'oraa, ua parau Mose i te ati Iseraela: "E faatupu to Atua ra o Iehova i te hoê peropheta na oe i rotopu ia oe ra, i te hoê i te mau taeae no oe ra, mai

13. Mea nafea te mau aratai o te nunaa o te Atua i taa ê ai i te mau aratai o te tahi atu mau nunaa?

14. No te aha Iehova i a'o ai i te tahi atu mau aratai o to 'na nunaa?

15. (a) Mea nafea te mau peropheta i te faaiterara e e tae mai te hoê aratai tia roa? (b) O vai te aratai tia roa?

ia 'u nei; oia ta outou e faaroo." (Deut. 18:15) Ua parau Isaia e e riro mai o 'Na "ei aratai, e ei faaau ture." (Isa. 55:4) E ua papai Daniela no nia i te Mesia o te riro mai ei "Arii," oia hoi ei Aratai. (Dan. 9:25) Faataa 'tura Iesu Mesia e o 'na te "aratai" o te nunaa o te Atua. (**A taio i te Mataio 23:10.**) Ua pee ta Iesu mau pipi ia 'na ma te aau tae e ua tiaturi e na Iehova i maiti ia 'na. (Ioa. 6:68, 69) Na te aha i haapapu ia ratou e o Iesu Mesia iho â ta Iehova e faaohipa no te aratai i to 'na nunaa?

<sup>16</sup> **Ua horoa te varua mo'a i te puai ia Iesu.** I to Iesu bapetizoraahia, "ite a'era

---

## Ua faatoroa Iehova ia Iesu ei Aratai tia roa

---

oia [Ioane] i te ra'i i te haearaa, e te varua i te pouraa mai i nia ia 'na." I muri rii a'e i te reira to "te varua . . . tonoraa ia 'na i te medebara." (Mar. 1:10-12) I te roaraa o te taviniraa a Iesu i te fenua nei, ua horoa te varua mo'a a te Atua i te puai ia 'na no te haapii e no te faatupu i te mau semeio. (Ohi. 10:38) Hau atu â, ua tauturu te varua mo'a ia Iesu ia faatupu i te mau huru maitatai mai te here, te oaoa e te faaroo puai. (Ioa. 15:9; Heb. 12:2) Aita i nae i te tahi atu mau aratai i tera faito. Mea papu, ua maiti iho â Iehova ia Iesu ei Aratai.

<sup>17</sup> **Ua tauturu te mau melahi ia Iesu.** I muri iti noa 'e a bapetizohia 'i Iesu, "e mau melahi tei haere mai e ua tauturu mai-ia ia 'na." (Mat. 4:11) Tau hora hou oia a

16. Eaha te haapapuraa e ua horoa te varua mo'a i te puai ia Iesu?

17. Eaha ta te mau melahi i rave no te tauturu ia Iesu?





ra'i aore ra te poieteraa i te ao nui. Ua haafaufaa râ oia i te Parau a te Atua, hinaaroru atura oia e faaite i te reira ia vetahi ê, e "ua faaite maira oia i to ratou aau ia ite ratou i te parau i papaihia ra."—Luka 24: 32, 45.

<sup>20</sup> Noa 'tu ua faahiahia roa te taata no ta Iesu huru paraparau, ua horoa noa oia i te hanahana ia Iehova, **to 'na** Orometua. (Luka 4:22) A tamata 'i te hoê taata tao'a i te faahanahana ia Iesu i teie tiaraa "orometua maitai," ma te haehaa ua parau Iesu: "Eaha oe i haamaitai mai ai ia 'u? o te Atua ana'e ra te maitai." (Mar. 10:17, 18) Mea taa ê roa te huru feruriraa o Iesu i to Heroda Ageripa I o tei riro ei aratai no Iudea e va'u matahiti i muri a'e. I te hoê mahana, i te hoê putuputuraa taa ê, ua oomo o Heroda i te hoê ahu arii purapura e te moni roa. A ite ai e a faaroo ai te taata ia 'na, ua tuô ratou: "E reo ia no te Atua, e ere ia i to te taata." Mea au roa na Heroda ia aruehia oia. Eaha râ tei tupu? "Ua tairi

20. (a) Mea nafea Iesu i te faahanahanaraa ia Iehova? (b) Eaha te taa-ê-raa i rotopu i te huru feruriraa o Iesu e to Heroda Ageripa I?

maira te melahi a te Fatu ia 'na i reira ra, no te mea aore oia i horoa 'tu i te haamaitai i te Atua ra; pau atura oia i te amuhia e te iro [aore ra to'e], e pohe atura." (Ohi. 12:21-23) Mea papu, aita Iehova i maiti ia Heroda ei aratai. Ua haapapu râ Iesu e ua maiti Iehova ia 'na, e ua faahanahana noa oia ia Iehova ei Aratai hau ê no to 'na nunaa.

<sup>21</sup> Ua hinaaro Iehova ia riro mai Iesu ei Aratai tau matahiti hau atu â. I muri a'e i to 'na tia-faahou-raa, ua parau Iesu i ta 'na mau pîpî: "O te mana atoa i te ra'i e te ao atoa nei ua pûpûhia mai tei ia 'u ana'e." Ua na ô faahou oia: "E inaha, tei pihai atoa iho ia vau ia outou, e tae noa 'tu i te hopea o teie nei ao." (Mat. 28:18-20) E nafea Iesu o te ore e ite-mata-hia e aratai ai i te nunaa o te Atua i te fenua nei? O vai ta Iehova e faaohipa ei tia no Iesu i te fenua nei? E nafea te mau Kerisetiano e nehenehe ai e taa i to te Atua mau tia? E hi'opoa mai tatou i roto i to muri mai tumu parau te mau pahonora a o teie mau uiraa.

21. Eaha ta tatou e hi'opoa mai i roto i to muri mai tumu parau?

## NO TE TAA MAITAI ATU Â I TEIE TUMU PARAU

A **horoa 'i te varua mo'a i te puai** i te mau aratai o to te Atua nunaa, ua fana'o ia ratou i te puai no ô mai i te Atua no te rave i te mau mea o ta ratou i ore i nehenehe e rave ma to ratou iho puai. Noa 'tu e aratai tia roa o 'na, ua hinaaro atoa Iesu i te varua mo'a

**Te mau tia o te Atua**, o te feia ia o ta te Atua i maiti no te aratai i to 'na nunaa



## O vai te aratai ra i to te Atua nunaa i teie mahana?

“[A] haamana’o i to outou mau aratai.”—HEB. 13:7.

HIMENE: 125, 43

### E NAFAEA OUTOU IA FAATAA?

I te tau o te mau aposetolo e i teie mahana, mea nafea te feia aratai i rotopu i te nunaa o te Atua . . .

i te fana’oraa i te puai o te varua mo’a?

i te tautururaahia e te mau melahi?

i te aratairaahia e te Parau a te Atua?

TEI nia te mau aposetolo a Iesu i te mou’a Oliveta e te hi’o ra ratou i to ratou fatu e hoa, o Iesu, te haere ra i te ra’i e vehihia ’tura oia e te hoê ata. (Ohi. 1:9, 10) Fatata e piti matahiti i te maoro, ua haapii, ua faaitoito e ua aratai Iesu ia ratou. I teie nei râ, aita faahou oia. Eaha ia ta ratou e rave?

<sup>2</sup> Hou a haere ai i te ra’i, ua parau Iesu i ta ’na mau pîpî: “Ei ite hoi outou no ’u i Ieruselema nei e Iudea atoa hoi e ati noa ’’e, e Samaria, e tae noa ’tu i te hopea o te fenua.” (Ohi. 1:8) E nafea râ ratou e rave ai i teie ohipa? Ua fafau Iesu e e tauturu te varua mo’a o te Atua ia ratou. (Ohi. 1:5) O vai ma râ te aratai ia ratou e te faanaho i ta ratou ohipa poraa na te ao atoa nei? Ua ite te mau aposetolo e ua faaohi-pa Iehova i te tahi mau tane no te aratai i te mau Iseraela i tahito ra. Peneia’e ia ua uiui ratou e e maiti anei Iehova i teie nei i te hoê aratai apî.

1, 2. I muri a’e a haere ai Iesu i te ra’i, eaha paha ta te mau aposetolo i uiui?

<sup>3</sup> Aita i maoro a haere ai Iesu i te ra’i, ua hi’opoa te mau pīpī i te mau Papai, ua ani i ta te Atua tauturu e ua maiti ia Matatia no te mono ia Iuda Isakariota, te 12raa o te aposetolo. (Ohi. 1:15-26) No te aha mea faufaa roa ’i teie maitiraa no ratou e no Iehova? Ua taa i te mau pīpī e mea titauhia 12 aposetolo.\* Ua maiti e ua faaineine Iesu i te mau aposetolo no te hoê hopoia rahi mau i rotopu i te nunaa o te Atua. Eaha tera hopoia e mea nafea Iehova e Iesu i te faaineineraa ia ratou no te reira? Eaha te hoê â faanahoraa e itehia ra i teie mahana? E nafea tatou e nehenehe ai e “haamana’o i to [ta]tou mau aratai,” te “tavini haapao maitai e te paari” iho â râ?—Heb. 13:7; Mat. 24:45.

#### NA IESU E ARATAI I TE TINO ARATAI

<sup>4</sup> Ua haamata te mau aposetolo i te aratai i te amuiraa Kerisetiano i te Penetekose 33. Te parau ra te Bibilia: “Ua tia a’era . . . Petero, e te ahuru ma hoê atoa ra i nia” e ua haapii i te parau mau faaora i te hoê nahoa rahi. (Ohi. 2:14, 15) E rave rahi taata o teie nahoa tei riro mai ei Kerisetiano. I muri a’e i te reira, ua “mau papu maite atura” teie mau Kerisetiano apī “i ta te mau aposetolo i haapii.” (Ohi. 2:42) Ua horoahia i te mau aposetolo te hopoia e haapao i te moni a

\* E au ra e ua hinaaro Iehova 12 aposetolo, ia riro mai ratou na “auahuru ma piti niu” no Ierusalemā apī. (Apo. 21:14) No reira, aita e faufaa e mono i te mau aposetolo **haapao maitai** o tei pohe i muri a’e.

3. (a) I muri a’e a haere ai Iesu i te ra’i, eaha te tahi faaotiraa faufaa mau ta te mau aposetolo i rave? (b) Eaha te mau uiraa ta tatou e pahono i roto i teie tumu parau?

4. Eaha te hopoia a te mau aposetolo e te tahi atu mau matahiapo i Ierusalemā?

te amuiraa. (Ohi. 4:34, 35) Ua haapii atoa ratou i te nunaa o te Atua e ua pure no ratou ma te parau: “Ei te pure matou eiaha e faaea, e ei te haapii hoi i te parau.” (Ohi. 6:4) E ua tonono atoa ratou i te mau Kerisetiano aravihi e poro i roto i te mau tuhaa fenua apī. (Ohi. 8:14, 15) I muri a’e, ua apiti te tahi atu mau matahiapo faatavaihia i te mau aposetolo no te aratai i te amuiraa. Ei tino aratai, ua horoa ratou i te aratairaa na te mau amuiraa atoa.—Ohi. 15:2.

---

## Ua ite te mau Kerisetiano o te senekele matamua e na Iehova i aratai i te tino aratai maoti Iesu

---

<sup>5</sup> Ua ite te mau Kerisetiano o te senekele matamua e na Iehova i aratai i te tino aratai maoti Iesu. Mea nafea i papu ai ia ratou? A tahi, ua horoa te **varua mo’a** i te puai i te tino aratai. (Ioa. 16:13) Ua fana’o pauroa te mau Kerisetiano faatavaihia i te varua mo’a, te mau aposetolo iho â râ e te mau matahiapo no Ierusalemā, ia amo maite ratou i ta ratou hopoia ei tiaau. Ei hi’oraa, i te matahiti 49, ua aratai te varua mo’a i te tino aratai no te rave i te hoê faaotiraa no nia i te peritomeraa. Ua pee te mau amuiraa

5, 6. (a) Mea nafea te varua mo’a i horoa ’i i te puai i te tino aratai? (A hi’o i te hoho’a matamua.) (b) Mea nafea to te mau melahi tautururaa i te tino aratai? (c) Mea nafea te Parau a te Atua i te aratairaa i te tino aratai?

i teie aratairaa. “Itoito atura” ratou “i te faaroo, tupu atura i te rahiraa, aita e mahana tuua.” (Ohi. 16:4, 5) I roto i te rata na te mau amuiraa no nia i te peritome-  
raa, e nehenehe tatou e ite e ua fana’o te tino aratai i te varua mo’a o te Atua e ua faaite i te mau huru maitatai mai te here e te faaroo.—Ohi. 15:11, 25-29; Gal. 5: 22, 23.

<sup>6</sup> Te piti, ua tauturu te mau **melahi** i te tino aratai. Ei hi’oraa, ua faaue te hoê melahi ia Korenelio ia tii i te aposetolo Petero. I muri a’e i to Petero pororaa ia Korenelio e i to ’na fetii, ua fana’o ratou i te varua mo’a, noa ’tu aita te mau tane i peritomehia. O Korenelio ia te taata matamua peritome-ore-hia no roto mai i te tahi nunaa ê tei riro mai ei Kerisetiano. A faaroo ai te mau aposetolo e te tahi atu mau taeae no nia i te reira, ua farii ratou i to te Atua hinaaro e ua farii popou i te feia peritome-ore-hia o te mau nunaa êê i roto i te amuiraa Kerisetiano. (Ohi. 11:13-18) I roto i tera faatiraa, e nehenehe tatou e ite e ua turu te mau melahi ma te itoito rahi i te ohipa pororaa ta te tino aratai i tiaau. (Ohi. 5: 19, 20) Te toru, ua aratai te **Parau a te Atua** i te tino aratai. Ua faaohipa tera mau tane i te mau Papai no te tauturu ia ratou ia rave i te mau faaotiraa faufaa no nia i te mau tiaturiraa Kerisetiano e no te aratai i te mau amuiraa.—Ohi. 1:20-22; 15:15-20.

<sup>7</sup> Noa ’tu e mana to te tino aratai i roto i te amuiraa, ua taa i teie mau mero e o Iesu Mesia to ratou Aratai. Mea nafea tatou i te iteraa i te reira? Ua parau te apo-

setolo Paulo e na te Mesia i faatoroa i te “tahi pae ei aposetolo.” Ua parau atoa oia e o te Mesia “te upoo,” aore ra Aratai, o te amuiraa. (Eph. 4:11, 15) Aita ratou i pii ia ratou iho ei aposetolo, ua mairihia râ “to te mau pîpî i’oa e Kerisetiano.” (Ohi. 11:26) Ua ite Paulo e mea faufaa ia pee i te mau haapiiraa niuhia i nia i te Bibilia ta te mau aposetolo e te tahi atu mau tane aratai i horoa. Ua parau râ Paulo: “Teie râ to ’u hinaaro, ia haapao outou, e o te Mesia te upoo o te **taata atoa** nei.” No te mau mero atoa o te tino aratai teie parau. Ua faataa faahou Paulo: “To te Mesia ra upoo, o te Atua ia.” (Kor. 1, 11:2, 3) Mea papu, ua faatoroa Iehova i ta ’na Tamaiti, ia Iesu Mesia, no te aratai i te amuiraa.

### “E ERE NA TE TAATA TE OHIPATA TATOU E RAVE NEI”

<sup>8</sup> Mai te matahiti 1870, ua haamata Charles Taze Russell e te tahi atu mau hoa to ’na i te tamata i te haamori i te Atua ia au i te Bibilia e i te tauturu ia vetahi ê ia na reira. Te auraa ia e e tauturu atoa ratou i te feia na roto e rave rau reo. Ua haamauhia ia te taiete Zion’s Watch Tower Tract Society i 1884 e o Taeae Russell tei riro mai ei peretiteni.\* Ua haapii maite oia i te Bibilia e aita oia i mātā’u i te parau ia vetahi ê e aita to roto i te Bibilia te haapiiraa a te ekalesia no nia i te Toru tahi e te haapiiraa e ora ’tu te tahi mea i roto i te taata ia pohe o ’na. Ua haapii oia e eita te ho’iraa mai o te

\* Mai 1955 mai â, ua matauhia teie taiete i te i’oa Watch Tower Bible and Tract Society of Pennsylvania.

8, 9. Eaha te hopoia faufaa mau a taeae Russell?

Mesia e ite-mata-hia e e hope “to te Ete-  
ne anotau” i 1914. (Luka 21:24) Ua faa-  
ohipa taeae Russell i to ’na taime, to ’na  
puai e ta ’na moni no te haapii i teie pue  
parau mau ia vetahi ê. Mea papu e ua  
faaohipa Iehova e Iesu ia taeae Russell  
no te aratai i te ohipa i te hoê taime fau-  
faa mau o to tatou aamu.

<sup>9</sup> Aita roa ’tu taeae Russell i hinaaro e  
huti i te ara-maite-raa o te taata i nia ia  
’na. I 1896, ua papai oia e te tahi atu mau  
tane amo hopoia e eita roa ’tu ratou e  
hinaaro ia faahanahanahia ratou. Aita  
ratou i hinaaro ia horoahia ’tu te tahi  
noa ’e tiaraa taa ê, e oia atoa ia piihia te  
tahi pūpū ma to ratou i’oa. Ua parau oia  
i muri a’e: “E ere na te taata te ohipa ta  
tatou e rave nei.”

<sup>10</sup> I 1919, e toru matahiti i muri a’e i to  
taeae Russell poheraa, ua faatoroa Iesu i  
“te tavini haapao maitai e te paari.”  
Eaha ia te fa? No te horoa i te “maa i te  
hora mau” na ta ’na mau pīpī. (Mat. 24:  
45) I te omuaraa ra o tera mau matahiti,  
na te hoê pūpū iti taeae faatavaihia i te  
pu rahi i Brooklyn, New York, i horoa i  
te maa varua na te mau pīpī a Iesu. Ua  
haamata te parau “tino aratai” i te itehia  
i roto i ta tatou mau papai i muri a’e i te  
matahiti 1940. I tera taime, e tuatiraa  
piri roa to rotopu i te tino aratai e te mau  
mero no te apooraa tiaauraa o te Watch  
Tower Bible and Tract Society. Tera râ, i  
1971, ua haapapu-maitai-hia e mea taa ê  
te Tino aratai e te Watch Tower Society,  
o tei haapao noa na i te mau ohipa i te

10. (a) Inafea Iesu i te faatoroaraa i “te tavini  
haapao maitai e te paari”? (b) A faataa mea na-  
fea i papu ai e mea taa ê te Tino aratai i te Watch  
Tower Society.

pae o te ture. Mai reira mai, ua nehenehe  
te mau taeae faatavaihia e riro mai ei  
mero o te Tino aratai noa ’tu e ere ratou  
no roto mai i te apooraa tiaauraa a te  
Taiete. Aita i maoro a’enei, ua haamata  
te tahi mau taeae amo hopoia no roto  
mai i te mau “mamoe ê atu” i te tavini ei  
mero faatere o te Taiete e te tahi atu mau  
pu ta te nunaa o te Atua e faaohipa. E

---

## “Te tavini haapao maitai e te paari,” o te hoê ia pūpū iti taeae faatavaihia o tei piihia te Tino aratai

---

nehenehe ia te Tino aratai e haapao i te  
horoaraa i te haapiiraa e te aratairaa Bi-  
biliana. (Ioa. 10:16; Ohi. 6:4) Ua faataa *Te  
Pare Tiairaa* o te 15 no Tiurai 2013, “te ta-  
vini haapao maitai e te paari,” o te hoê  
ia pūpū iti taeae faatavaihia o tei piihia  
te Tino aratai.

<sup>11</sup> E rave te Tino aratai i te mau faaoti-  
raa faufaa ei pūpū ia putuputu ratou i  
te mau hebedoma atoa. E tauturu teie  
putuputuraa ia ratou ia aparau maite e ia  
vai hoê noa. (Mas. 20:18) Aita hoê a’e  
mero o te Tino aratai i hau a’e i te tahi  
atu mau mero. No reira, i te mau mata-  
hiti atoa, e tau i noa te taeae e aratai i te  
mau putuputuraa. (Pet. 1, 5:1) Hoê â  
huru i roto i na ono Tomite o te Tino ara-  
tai. Eita hoê noa ’e mero o te Tino aratai

11. E nafea te Tino aratai e rave ai i te mau faa-  
otiraa?





Te Tino aratai  
i te mau  
matahiti 1950



Mai i to 'na faatoroaraahia mai ā, i 1919, ua faaineine te tavini haapao maitai i te maa varua na te nunaa o te Atua  
(A hi'o i te paratarafa 10, 11)



e mana’o e o ’na te aratai o to ’na mau taeae. E tavini utuafare atoa ratou pau-roa. E fana’o ratou i te maa varua no ō mai i te tavini haapao maitai ra e e pee ratou i ta ’na aratairaa.

### “O VAI [MAU] HOI TE TAVINI HAAPAO MAITAI E TE PAARI”?

<sup>12</sup> Eita te Tino aratai e fana’o i ta te Atua mau faaiteraa, e mea tia ore ratou. E nehenehe atoa ratou e hape ia faataa

12. Eaha na uiraa ta tatou e pahono i muri nei?

ratou i te Bibilia aore ra ia aratai i te faa-nahonahoraa. Ei hi’oraa, i roto i te *Index des publications des Témoins de Jéhovah*, i te tumu parau “Compréhensions affinées,” te vai ra te mau faatanoraa o te mau haamaramaramaraa Bibilia mai 1870 mai ā. Aita Iesu i parau e e faaineine ta ’na tavini haapao maitai i te maa varua ma te tia roa. E nafea ia tatou e nehenehe ai e pahono i ta Iesu uiraa: “O vai [mau] hoi te tavini haapao maitai e te paari”? (Mat. 24:45) Na te aha e haapa-

pu e o te Tino aratai te tavini haapao maitai? E hi'opoa ana'e i na ohipa e toru o tei tauturu i te tino aratai i te tau o te mau aposetolo.

**13 Te tauturu ra te varua mo'a i te Tino aratai.** Ua tauturu te varua mo'a i te Tino aratai ia taa i te pue parau mau Bibilia ta te taata i ore i taa na mua 'e. Ei hi'oraa, a hi'o na i te anairaa o te "Compréhensions affinées" i faahitihia i nia 'tu. Aita hoê a'e taata e nehenehe e taa e e faataa i teie "mau mea hohonu . . . a te Atua" ma to 'na iho maramarama! **(A taio i te Korinetia 1, 2:10.)** Te mana'o atoa ra te Tino aratai mai te aposetolo Paulo o tei papai: "Te mau mea . . . ta matou e parau nei, e ere ra ma te parau haapiihia mai e te paari e te taata nei, o ta te Varua râ i haapii mai." (Kor. 1, 2:13) E rave rahi hanere matahiti te mau haapiiraa hape i te parareraa, aita atoa i itehia te aratairaa papu. No te aha ia i rahi roa mai ai te mau haamaramaramaraa Bibilia mai 1919 mai â? No te mea ia ua tauturu te Atua ma to 'na varua mo'a.

**14 Te tauturu ra te mau melahi i te Tino aratai.** E hopoia rahi ta te Tino aratai no te aratai i na va'u mirioni feia poro i roto i te ohipa pororaa na te ao atoa nei. No te aha i manuïa roa 'i teie ohipa? Teie hoê tumu: te turu ra te mau melahi. **(A taio i te Apokalupo 14:6, 7.)** I roto e rave rahi tupuraa, ua aratai te mau melahi i te feia poro i te hoê taata

---

13. Mea nafea te varua mo'a i tauturu ai i te Tino aratai?

14. Ia au i te Apokalupo 14:6, 7 e nafea te mau melahi e tauturu ai i te Tino aratai e te nunaa o te Atua i teie mahana?

no pure noa 'tura i te Atua no te ani i ta 'na tauturu!\* Te maraa noa 'tura te ohipa pororaa e haapiiraa i te mau vahi e itehia 'i te patoraa u'ana. Maoti noa te tauturu a te mau melahi e itehia 'i te reira.

**15 Te aratai ra te Parau a te Atua i te Tino aratai. (A taio i te Ioane 17:17.)** A hi'o na i tei tupu i 1973. Ua ui *Te Pare Tiairaa* o te 1 no Tetepa (Farani) e te faa'anei ra "te feia o tei ore i faaea i te puhipuhi i te avaava i te mau titauraa no te bapetizoraa." Ia au i te mau aratairaa Bibilia, teie te pahonora a i matara mai: eita ratou e faa'i i te mau titauraa. Ua faahiti *Te Pare Tiairaa* e rave rahi irava e ua faataa no te aha e tia ia tiavaruhia te taata o te ore e faaea i te puhipuhi i te avaava. (Kor. 1, 5:7; Kor. 2, 7:1) Ua parau atoa e e ere na te taata teie ture aveia etaeta, no ô mai râ "i te Atua ra, o tei horoa mai i to 'na mana'o **na roto i ta 'na Parau papaihia.**" Aita e faanahonora a mai teie, tei ineine i te turui maite i nia i te Parau a te Atua, noa 'tu ua riro ei mea fifi roa no te tahi mau mero. Ua parau te hoê buka apî no nia i te haapao-raa i Marite: "Pinepine te mau aratai haapaoraa Kerisetiano i te hi'opoa faahou i ta ratou mau haapiiraa, ia tuati te reira i te mau tiaturiraa e mana'o ta ta ratou mau mero e te taiete atoa e paturu nei." Eita râ te Tino aratai e pee i ta te rahiraa o te taata e au. E pee râ taua mau taeae ra i te Parau a te Atua, te mea

---

\* A hi'o i te buka "*Rends pleinement témoignage au sujet du Royaume de Dieu*" i te api 58-59.

15. Eaha te taa-ê-raa i rotopu i te Tino aratai e te mau aratai haapaoraa e parau ra e Kerisetiano ratou? A horoa i te hoê hi'oraa.

e haapapu ra e o Iehova te aratai mau ra i to 'na nunaa i teie mahana.

### “E HAAMANA’O I TO OUTOU MAU ARATAI”

<sup>16</sup> **A taio i te Hebera 13:7.** Te parau ra te Bibilia ia “haamana’o i to outou mau aratai.” E nehenehe tatou e faahiti i te Tino aratai i roto i ta tatou mau pure. (Eph. 6:18) Mea rahi ta ratou hopoia: horoa i te maa varua, aratai i te pororaa, e haapao i te mau ô horoa noa pûpûhia i te faanahonahoraa. No reira e titauhia ’i ia pure tamau tatou no ratou!

<sup>17</sup> E haamana’o atoa tatou i te Tino aratai ma te pee i ta ’na mau titauraa e aratairaa. E horoa mai te Tino aratai i te aratairaa na roto i ta tatou mau piaraa, putuputuraa e tairururaa. E faatoroa atoa i te mau tiaau haaati, o te faatoroa i muri iho te mau taeae ei matahiapo. Ma te pee maite i te mau aratairaa horoahia ia ratou, te faaite ra ia te mau tiaau haaati e te mau matahiapo e te haamana’o ra ratou i te Tino aratai. E faatura atoa tatou pauroa i to tatou Aratai, ia Iesu, ia auraro tatou i te mau tane ta ’na e faohipa ra i teie mahana.—Heb. 13:17.

16. Eaha hoê ravea no te haamana’o i te Tino aratai?

17, 18. (a) E nafea tatou e pee ai i te aratairaa a te Tino aratai? (b) E nafea ta tatou pororaa e turu ai i te Tino aratai e ia Iesu?

<sup>18</sup> Ma te haa rahi i roto i te pororaa, e haamana’o atoa tatou i te Tino aratai. Te faaitoito ra te Hebera 13:7 i te mau Kerisetiano ia pee i te faaroo o tei aratai ia ratou. Ua faaite te Tino aratai i te faaroo rahi a poro e a faaite ai ratou i te parau apî oaoa ma te itoito rahi. Te turu atoa ra anei tatou i teie mau taeae i roto i teie ohipa faufaa? Mai te peu e e, e oaoa tatou ia faaroo ia Iesu e parau mai ra: “O outou i na reira i te hoê taeae iti haihai roa i roto i tau mau taeae nei, ua na reira mai ia outou ia ’u.”—Mat. 25:34-40.

<sup>19</sup> I to Iesu ho’iraa i te ra’i, aita oia i faarue i ta ’na mau pîpî. (Mat. 28:20) Ua ite oia e ua tauturu te varua mo’a, te mau melahi e te Parau a te Atua ia ’na ia rave i te aratairaa a haere mai ai oia i te fenua nei. Te horoa ra oia i teie mahana i te hoê â tauturu i te tavini haapao maitai. Te tamau ra te Tino aratai i te “pee i te Arenio,” ia Iesu, “i to ’na atoa ra mau haerea.” (Apo. 14:4) Te auraa, ia pee tatou i te aratairaa a te Tino aratai, te pee ra ia tatou i to tatou Aratai, ia Iesu. Fatata roa o ’na i te aratai ia tatou i te ora mure ore. (Apo. 7:14-17) Aita e taata aratai e nehenehe e fafau i te reira!

19. No te aha oe e faaoti ai e pee i to tatou Aratai, ia Iesu?

## NO TE TAA MAITAI ATU Â I TEIE TUMU PARAU

Pauroa te mau tavini a te Atua o te fana’o ra i te maa varua, e feia faatavaihia anei aore ra e mau mamoe ê atu, e piihia ratou “utuafare,” aore ra **tavini utuafare**, i roto i te Mataio 24:45

# Ua ite mâua i to te Atua hamani maitai rahi i roto e rave rahi tupuraa

FAATIAAA A DOUGLAS GUEST

NO TO 'NA here i te Atua i to 'na apîraa, ua hinaaro to 'u papa, o Arthur to 'na i'oa, e riro mai ei orometua *Méthodiste*. Ua tau i râ to 'na mana'o i to 'na taioraa i te tahi mau papai horoahia e te Feia haapii Bibilia, e i to 'na haamataraa i te amui ia ratou. I 1914, i te 17raa o to 'na matahiti, ua baptizohia to 'u papa. I te Tama'i rahi matamua, ua faauehia o 'na ia haere e aro. Ua patoi râ oia. Faautuahia 'tura o 'na ahuru ava'e i te fare auri no Kingston i Ontario, Kanada. I muri a'e i to 'na matararaa mai, ua riro mai oia ei pionie.

I 1926, ua faaipoipo to 'u papa ia Hazel Wilkinson. Ua haapii te mama o Hazel i te parau mau i 1908. Ua fanauhia vau i te 24 no Eperera 1931. E maha tamarii matou, o vau te piti. Ua haafaufaa e ua faatura to 'u papa i te Bibilia. Ua haapii mai oia ia matou ia na reira atoa. Ua riro te haamoriraa ia Iehova ei mea faufaa i roto i to matou oraraa. Pinepine vau e to 'u utuafare e haere e poro.—Ohi. 20:20.

## MAI TO 'U PAPA, UA TAPEA VAU I TO 'U TIARAA AMUI ORE E UA RIRO MAI AU EI PIONIE

I 1939, ua haamata te Piti o te tama'i rahi. I te matahiti i muri a'e, ua opanihia te ohipa pororaa a te mau Ite no Iehova i Kanada. Ua titauhia i te mau tamarii ia faahanahana i te reva e ia himene i te pehe ai'a i roto i ta ratou piha haapiiraa. Faatia noa na te mau orometua haapii ia haere mâua to 'u tuahine o Dorothy i rapae ia himene ratou. I te hoê râ mahana, ua tamata ta 'u orometua i te faahaama ia 'u ma te parau e e mâtâ'u hanoa vau. I muri a'e i te haapiiraa, e rave rahi hoa haapiiraa tei tapiri mai no te hamani ino ia 'u a marua roa 'tu ai au i raro i te repo. Ua haapuai roa 'tu â râ te reira i to 'u hinaaro e faaroo i te Atua, "eiaha te taata."—Ohi. 5:29.

I Tiurai 1942, i te 11raa o to 'u matahiti, ua baptizohia vau i roto i te hoê vairaa pape i te hoê vahi e faaamuhia 'i te mau animara. Mea au roa na 'u e rave i te taviniraa pionie tauturu aita ana'e e haapiiraa. I te hoê matahiti, ua tae roa vau e toru atoa taeae i te pae apatoerau o Ontario, i reira matou i te pororaa i te mau taata tapu raau.

I te 1 no Me 1949, ua rave au i te taviniraa pionie taime taatoa. Titau-manihini-hia 'tura vau i te amaa no Kanada no te tauturu i te ohipa paturaa. Ua riro roa mai au i muri a'e ei mero o te utuafare o te Betela no Kanada. Ua ohipa vau i te vahi neneiraa, i reira vau i te haapiiraa e nafea ia faaohipa i te matini neneiraa parauhia *presse cylindrique*. Te haamana'o ra vau i te ohiparaa pauroa te po e rave rahi hebedoma no te tauturu i te neneiraa i te hoê api parau no nia i te hamani-ino-raa i nia i te mau Ite no Iehova i Kanada.

I muri a'e, ua ohipa vau i roto i te Tuhaa taviniraa. Ua titauhia ia 'u ia uiui i te mau pionie o te haere e tavini i Quebec, i reira e itehia 'i te hamani-ino-raa u'ana mau. O Mary Zazula hoê o na pionie, no Edmonton mai oia, i Alberta. E mau mero no te Ekalesia Kerisetiano no hitia o te râ to 'na na metua. A patoi ai Mary e to 'na taeae matahiapo i te faaea i ta raua haapiiraa Bibilia, ua tiahi to raua na metua ia raua. Ua baptizohia Mary e to 'na taeae i Tiunu 1951, e 6 ava'e i muri iho, ua riro mai raua ei pionie. I tera uiuiraa mana'o, ua ite au e ua here mau â Mary ia Iehova. Te haamana'o ra vau e ua na ô vau ia 'u iho e teie te huru vahine ta 'u e hinaaro e faaipoipo. E iva ava'e i muri iho, ua faaipoipo mâua i te 30 no Tenuare 1954. Hoê hebedoma i muri a'e i to mâua faaipoiporaa, ua titau-manihini-hia mâua no te faaineraa no te tuhaa haaati. I na piti matahiti i muri



iho, ua tavini mâua i roto i te tuhaa haaati i te pae apatoerau o Ontario.

Ua maraa te ohipa pororaa na te ao nei, ua titauhia hau atu â mitionare. Ua mana'ô mâua Mary e mai te peu e e nehenehe mâua e faaruru i te tau toetoe e te naonao i te tau veavea i Kanada, e nehenehe mâua e ora i te mau vahi atoa. Ua apiti mâua i te 27raa o te Haapiiraa no Gileada e ua faatuïtehia mâua i Tiurai 1956. I Novema, tei roto mâua i to mâua fare apî, i Beresilia.

## MITIONARE I BERESILIA

I to mâua tapaeraa 'tu i Beresilia, ua haamata mâua i te haapii i te reo Potiti. Na mua, ua haamata mâua i te haapii i te pereota ohie no te omua i te hoê aparauraa. I muri a'e, ua tamau aau mâua i te hoê hi'oraa poto no te pûpû i te vea. I muri iho, ua haere mâua e poro e ua farerei i te hoê vahine o tei faaite i te anaanatae i ta mâua poroi. Ua faaoti mâua e ia anaanatae te fatu fare, e taïo mâua i te hoê irava no nia i te oraraa i raro a'e i te Faaterereraa arii a te Atua. Ua taïo ïa vau i te Apokalupo 21:3, 4 e matapoirihia 'tura vau! Aita vau i matau i te veavea e te haumi. E ua tamau te reira i te haafifi ia 'u.

Ua tonohia mâua ei mitionare i te oire no Campos. I teie mahana, 15 amuiraa i tera vahi! I to mâua râ tapaeraa 'tu, hoe ana'e pûpû atea i roto i tera oire e oia atoa hoê fare mitionare e maha tuahine: Esther Tracy, Ramona Bauer, Luiza Schwarz e Lorraine Brookes (i teie nei Wallen). Ta 'u ohipa i te fare mitionare, o te tautururaa ïa i te vahi papu'araa ahu e

te imiraa i te vahie no te tunu i te maa. I te Monire po i muri a'e i ta matou haapiiraa o *Te Pare Tiairaa*, te tarava ra o Mary i nia i te hoê tofa a tuu ai i to 'na upoo i nia i te turua. Te paraparau ra mâua no nia i ta mâua i rave i tera mahana. A tia 'i Mary, ua nee mai te hoê ophi mai raro a'e mai i te turua! Ua riarria roa mâua. Haapohe ihora vau i tera animara.

I muri a'e hoê matahiti i te haapiiraa i te reo Potiti, ua haamata mâua i te tavini i roto i te tuhaa haaati. Ua tavini mâua na te mau vahi aita e uira. Ua tauto noa mâua i nia i te peue e ua ratere na nia i te pereoo hutihia e te puaahorofenua. Hoê taime, ua na nia mâua i te pereoo auahi no te haere i te hoê oire iti i nia i te mou'a no te poro. Ua tarahu mâua hoê piha i ð. Ua hapono mai te amaa 800 vea no te faaohipa i roto i te pororaa. Ua titauhia ia haere i te fare rata e rave rahi taime no te tii i te mau afata vea.

I 1962, ua haamauhia te Haapiiraa no te taviniraa o te Basileia i te tahi atu mau vahi i Beresilia. I te hoê roaraa ono avae, ua tonohia vau i tera mau haapiiraa. Ua horoa vau i te faaineineraa i Manaus, Belém, Fortaleza, Recife e i te oire no Salvador. I Manaus, ua faanaho vau i te hoê tairururaa mataeinaa i te hoê fare hautiraa upaupa teata tuiroo. No te ùa rahi, aita i rahi te pape mâ no te inu, aita atoa e vahi maitai no te tamaa no te mau taeae e tuahine i te tairururaa. Ua paraparau vau i te hoê raatira faehau e faataa 'tura vau i to matou fifi. Faanaho atura oia i te pape inu na matou, ia navai no te taatoaraa o te taata tei tairuru mai. Ua tono atoa oia i te mau faehau

### I te mau matahiti 1940

Pionie i to 'u apiraa



### 1949

Ta 'u oreroraa parau matamua na te taata atoa



### I te mau matahiti 1950

Tavini i te Betela i Kanada



### 1954

To mâua faaipoiporaa



no te faatia e piti fare ie rarahi, ta matou ia i faaohi-  
pa ei vahi faaineineraa maa e tamaaraa.

A ratere ai au, ua haere Mary e poro i te hoê vahi  
tapihooraa. I reira, aita e taata e anaanatae i te  
paraparau no nia i te Bibilia. No te fenua Potiti mai  
teie mau taata, ua haere mai no te imi i te moni. Ua  
toaruaru roa Mary. Parau atura o 'na i to 'na mau hoa:  
"Eita roa 'tu vau e hinaaro e faaea i Potiti." Aita i ma-  
oro, tae mai nei hoê rata. O te hoê ia titau-manihini-raa  
no te haere e tavini i Potiti. Ua opanihia te pororaa i  
reira. Ua oti roa Mary! Ua farii râ mâua i teie hopoia.

### TA MÂUA TAVINIRAA I POTITI

Tae atura mâua i Lisbonne, Potiti, i Atete 1964. Ua  
haafifi te mau mutoi huna i to tatou mau taeae i rei-  
ra. Ua faaoti ia mâua i te omuaraa e mea maitai a'e  
eiaha e faaara i te mau Ite no Iehova no reira. Ua ta-  
rahu na mua mâua i te hoê piha. I te taeraa mai ta  
mâua parau faatia no te faaea i Potiti, tarahu atura  
mâua i te hoê nohoraa. Pae ava'e i muri a'e i nehe-  
nehe ai mâua e tapiri atu i te mau taeae i te amaa.  
Oaoa roa mâua i te apiti-faahou-raa i te hoê putu-  
puturaa!

No te mea ua opanihia ta matou ohipa, aita te  
mau Piha a te Basileia i faaohipa-faahou-hia. I te  
fare ia o te mau taeae te mau putuputuraa i te rave-  
raahia. Pinepine te mau mutoi i te haere paheru i ô  
ratou. Tau hanere taeae e tuahine tei afaihia i te aua  
mutoi no te mau uuiuraa. Ua rave ino te mau mutoi  
ia ratou e ua faahepo ia faaite i te i'oa o te mau tae-  
ae amo hopoia. No te paruru te tahi i te tahi, ua

faaea te mau taeae i te faaohipa i te mau pa'eraa, e  
ua pii te tahi i te tahi ma te i'oa noa.

Ta matou fa matamua, o te haapaoraa ia ia tae te  
mau papai i te mau taeae, ia tauturu te reira ia ratou  
ia faaoromai noa. E patapata Mary i te mau tumu  
parau haapiiraa o *Te Pare Tiiraa* e te tahi atu mau  
papai i nia i te hoê matini patapata ma te faaohipa i  
te hoê huru papie taa ê. E faaohipahia te reira no te  
hamani e rave rahi atu â papai na te mau taeae.

### TURU I TE PARAU APĪ OAOA I MUA I TE HAAVA

I Tiunu 1966, e haavaraa rahi tei tupu i Lisbonne.  
Ua parihia te taatoaraa o na 49 mero o te amuiraa  
no Feijó i te putuputuraa i roto i te hoê fare, aita ta  
ratou e parau faatia na te ture. No te faaineine ia ra-  
tou no te haavaraa, o vau te paruru o te tamata i te  
faahapa i te mau taeae. Mai ta matou râ i mana'o, ua  
pau matou. Ua faautuahia na 49 taeae e tuahine e  
45 mahana fare auri tae atu e pae ava'e e te afa. Ua  
horoa râ teie haavaraa i te hoê faaiteraa rahi mau.  
Inaha, i te haavaraa, ua faahiti to matou taata paru-  
ru i ta Gamaliela i parau i roto i te Bibilia. (Ohi. 5:  
33-39) I muri a'e, ua piahia te haavaraa na roto i te  
mau ravea haaparareraa parau apĪ. Oaoa roa matou  
i te haapiiraa to matou taata paruru i te Bibilia e to  
'na apitiraa mai i te mau putuputuraa.

I Titema 1966, ua riro vau ei tiaau amaa e ua faa-  
ohipa vau i te rahiraa o to 'u taima no te mau fifi i te  
pae o te ture. Ua tutava matou i te imi i te mau tumu  
e au i te ture ia nehenehe te mau Ite no Iehova e haa-  
mori ma te tiamâ i Potiti. (Phil. 1:7) I te 18 no Titema

1956

Tufaraa parau tuite no Gileada



1956-1964

Te taviniraa mitionare  
i Beresilia



Te haere ra vau  
e horoa i te hoê  
oreroraa parau  
na te taata atoa

Faaiteraa i roto i te  
afata teata te matararaa  
mai hoê o ta tatou mau  
papai apĪ



BERESILIA

1974, haamanahia 'tura to matou tiaraa. Ua haere roa mai taeae Nathan Knorr e Frederick Franz mai te pu rahi mai. Faatupuhia 'tura te hoê putuputuraa faahiahia mau i Oporto e i Lisbonne. E 46 870 taata tei tae mai.

Maoti Iehova, ua tae roa te ohipa pororaa na te mau motu e paraparauhia 'i te reo Potiti, mai te mau motu Açores, Cap-Vert, Madère e Sao Tomé-et-Principe. Ua rahi roa mai te numera o te mau Ite no Iehova i tera mau vahi, titauhia 'tura hoê amaa rahi a'e. I muri a'e i te paturaa, na taeae Milton Henschel i horoa i te oreroraa parau avariraa i te 23 no Epere-ra 1988. E 45 522 taeae e tuahine tei tae mai. I roto i tera numera, ua taiohia e 20 mitionare tei tavini na mua 'e i Potiti e ua ho'i mai no te avariraa.

### UA HAAPII MÂUA I TE MAU HI'ORAA HAAPAO MAITAI O VETAHI Ë

I tera roaraa matahiti, ua au roa mâua Mary i te haapiiraa no nia i te mau taeae taiva ore. Ei hi'oraa, i to 'u ohiparaa e te taeae Theodore Jaracz i roto i te hoê tere tuhaa fenua, ua huti mai au i te tahi mau haapiiraa faufaa mau. E fifi rahi to te hoê amaa ta mâua i haere e farerei, ua rave te Tomite amaa i te mau ravea atoa no te tauturu atu. Ua peapea roa ratou, aita ta ratou i nehenehe e rave hau atu â. Tamahanahana 'tura ia taeae Jaracz ia ratou ma te parau: "A vaiiho i teie nei i te varua mo'a ia ohipa." Eita atoa e moe ia 'u i ta taeae Franz i parau e rave rahi matahiti i teie nei a haere ai mâua Mary i Brooklyn. Ua ani vetahi i roto i ta matou pûpû i te mana'o tau-

turu, ua pahono taeae Franz ia matou: "Teie ta 'u e parau atu: A faaea noa i roto i ta Iehova faanahonahoraa noa 'tu te mau haafifiraa. Teie ana'e te faanahonahoraa te pee ra i ta Iesu i faaue i ta 'na mau pîpî ia rave: te pororaa i te parau apî oaoa o te Faatereraa arii a te Atua!"

Ua oaoa roa mâua Mary i te na reiraraa. E haamana'oraa oaoa mau ta mâua i te haereraa e farerei i te mau amaa na te ao atoa nei. Ua au roa mâua i te farereiraa i te mau tavini a Iehova o te mau faito matahiti atoa. Oia atoa, i te haapapuraa 'tu ia ratou e te haafaufaa ra Iehova i ta ratou taviniraa. Ua faaitoito noa mâua ia ratou ia tamau i te tavini ia 'na.

E rave rahi matahiti tei mairi i teie nei, ua hau atu i te 80 matahiti to mâua i teie mahana. Mea ma'ima'i roa Mary. (Kor. 2, 12:9) E te vai ra te tahi atu mau fifi ta mâua i farerei. Ua haapuai râ teie mau fifi i to mâua faaroo e ua puai atu â to mâua hinaaro e tapea i to mâua hapa ore ia Iehova. Ia feruri mâua i na rahiraa matahiti taviniraa ia Iehova, ua ite mâua e ua haamaitai Iehova ia mâua ma ta 'na hamani maitai rahi na roto e rave rahi tupuraa.\*

\* A faaineinehia 'i teie tumu parau no te neneiraa, ua pohe o Douglas Guest ma te taiva ore ia Iehova i te 25 no Atopa 2015.

Te haafaufaa ra mâua i ta mâua i rave i roto i te taviniraa a Iehova hau atu 60 matahiti i te maoro

#### 1964

Haamataraa te ohipa mitionare i Potiti

Te tere o te taeae Knorr i te taime a opanihia 'i ta tatou ohipa



#### 1966

I mua i te tiripuna i Lisbonne, e rave rahi taeae o te tiai ra i rapae no te faaite i to ratou turu



#### 1974

E tausani tei amui i te faorerahaia te opaniraa o ta tatou ohipa



*Ua papai te aposetolo Paulo: “E ore oia [Iehova] e vaiiho noa ia outou ia ati, maori râ o te tia ia outou ia faaoromai.” (Kor. 1, 10:13) Te auraa ïa e ua faaoti ê na Iehova eaha ta tatou e nehenehe e faaoromai, a maiti atu ai eaha te tamataraa ta tatou e faaruru?*

■ Mai te peu e tera iho â, a feruri na ïa i to tatou oraraa. Ei hi’oraa, ua haapohe te tamaiti a te hoê taeae ia ’na iho. Ua oto roa te papa. Ua mana’o noa oia e ua ite anei Iehova eaha te tupu mai a muri a’e, a faaoti atu ai e e haere ia ’na e i ta ’na vahine ia faaoromai i teie ati. I roto i teie nei ao, e rave rahi te faaruru ra i te ati. E tia anei ïa ia tiaturi e na Iehova e aratai ra i te mau tupuraa atoa i roto i to tatou oraraa?

A hi’opoa ’i i te Korinetia 1, 10:13, e ite mai tatou e aita te Bibilia e turu ra i te mana’o e ua ite ê na Iehova eaha ta tatou e nehenehe e faaoromai, e i muri iho oia e faaoti ai eaha te tamataraa ta tatou e faaruru. No te aha e nehenehe ai e parau i te reira? E hi’opoa ana’e e maha tumu.

*A tahi, ua horoa Iehova i te taata te tiamâraa e maiti.* E hinaaro oia ia rave tatou i ta tatou iho mau faaotiraa. (Deut. 30:19, 20; Ios. 24:15) Ia maiti tatou e rave i te mau faaotiraa o te faaoaoa ia Iehova, e nehenehe tatou e tiaturi ia ’na no te aratairaa ia tatou. (Mas. 16:9) Ia rave râ tatou i te mau faaotiraa iino, papu ïa e e ora tatou e te mau faahopearaa o te reira. (Gal. 6:7) Ahani pai e na Iehova i maiti eaha te tamataraa ta tatou e faaruru, e nehenehe anei ïa e parau e e tiamâraa e maiti to tatou?

*Te piti, eita Iehova e paruru ia tatou i te mau tupuraa mana’o-ore-hia.* (Koh. 9:12) E û paha te tahi taata i te ati peapea mau no te mea tei reira oia i te taime a tupu ai taua ati ra. Ua faahiti Iesu i te hoê ati e 18 taata tei pohe, ua topa te hoê fare rahi i nia ia ratou. Ua haapapu maitai oia e e ere na te Atua i haapohe ia ratou. (Luka 13:1-5) Mea maamaa ia mana’o e hou te hoê ati a tupu ai, e faaoti te Atua o vai te ora aore ra te pohe.

*Te toru, mea tia ia tapea tatou tataitahi i to tatou hapa ore i mua ia Iehova.* Ua pari Satani i te mau tavini a Iehova e e tavini ratou i te Atua no te mau mea ta ’Na e horoa na ratou. Ua parau Satani e e taiva tatou ia Iehova ia faaruru tatou i te mau tamataraa. (Ioba 1:9-11; 2:4; Apo. 12:10) Ia paruru Iehova ia tatou i roto i te tahi mau tamataraa, mai te mea ra ïa e ua tano Satani.

*Te maha, eita Iehova e maiti i te ite i te mau mea atoa o te tupu a muri mai.* Papu maitai, e nehenehe ta Iehova e ite eaha te tupu a muri a’e. (Isa. 46:10) Te faaite nei râ te Bibilia e eita o ’na e maiti i te ite i te mau mea atoa o te tupu a muri mai. (Gen. 18:20, 21; 22:12) E Atua here e te parau-tia o Iehova, eita ïa oia e faatere i to tatou tiamâraa e rave i ta tatou iho mau faaotiraa.—Deut. 32:4; Kor. 2, 3:17.

Eaha ïa ta Paulo i hinaaro e parau a na ô ai oia: “E ore oia [Iehova] e vaiiho noa ia outou ia ati, maori râ o te tia ia outou ia faaoromai”? I reira, ua faataa Paulo eaha ta Iehova e rave **i roto** i te mau tamataraa, eiaha **na mua ’tu**.<sup>\*</sup> Mai te peu e tiaturi tatou ia Iehova, e tauturu mai oia i roto i te mau tamataraa atoa ta tatou e faaruru. (Sal. 55:22) E hi’opoa mai tatou i teie nei e piti tumu e nehenehe ai Paulo e parau i te reira.

Te tumu matamua, **“mai ta te taata nei” te mau tamataraa ta tatou e faaruru ra.** I roto i te ao a Satani, e faaruru iho â tatou i te fifi, peneia’e e roohia atoa tatou i te ati. Ia tiaturi râ tatou ia Iehova, e nehenehe tatou e faaoromai i teie mau tamataraa a vai taiva ore noa ’tu ai. (Pet. 1, 5:8, 9) I roto i te

<sup>\*</sup> “Tamataraa,” aore ra “ati” te auraa o te ta’o Heleni hurihia ei “faahemaraa.”





E tamahanahana mai Iehova ia tatou i **roto** i to tatou mau ati atoa

Korinetia 1 pene 10, ua faahiti Paulo i te tahi mau tamataraa ta te mau Iseraela i ite i roto i te medebara. (Kor. 1, 10:6-11) Ua nehenehe te feia o tei tiaturi ia Iehova e faaruru i tera mau tamataraa. Ua faaroo ore râ te tahi mau Iseraela ia Iehova. Aita ratou i tiaturi ia 'na, aita 'tura ratou i vai taiva ore.

Te piti o te tumu, e **“Atua haavare ore”** Iehova. Eaha ia te auraa? Ia hi'o tatou mea nafea Iehova i te aupururaa i ta 'na mau tavini i te roaraa o te tau, e ite tatou e ua tauturu oia ma te taiva ore “i te feia i hinaaro ia 'na, e te haapao i ta 'na ra parau.” (Deut. 7:9) Te haapii ra tatou e e tapea iho â Iehova i ta 'na i fafau. (Ios. 23:14) Ua papu ia tatou e (1) eita Iehova e vaiho i te tahi noa 'e tamataraa ia riro mai ei mea fifi roa, a ore atu ai tatou e nehenehe e faaruru i te reira, e (2) “e faatupu atoa oia i te haapuraa” no tatou.

E nafea Iehova “e faatupu . . . i te haapuraa,” aore ra faoraraa, no te feia e tiaturi ia 'na? Parau mau, e nehenehe oia e faaore i te tamataraa. A haamana'o râ, ua parau Paulo e faatupu Iehova “i te haapuraa i taua ati ra, **ia tia ia outou ia faaoromai.**” E pinepine ia Iehova i te faaineine i te faaoraraa ma te haapuai ia tatou, ia nehenehe tatou e vai

taiva ore. E hi'o ana'e te tahi mau ravea e na reira 'i oia.

- E tamahanahana mai Iehova ia tatou i roto i to tatou mau ati atoa. (Kor. 2, 1:3, 4) E nehenehe oia e tamârû i to tatou feruriraa, aau e huru aau maoti te Bibilia, to 'na varua mo'a e te tavini haapao maitai.—Mat. 24:45; Ioa. 14:16; Roma 15:4.
- E faaohipa Iehova i to 'na varua mo'a no te aratai ia tatou. (Ioa. 14:26) E tauturu mai te varua mo'a ia haamana'o i te mau aamu Bibilia e ta 'na mau faaueraa tumu, a nehenehe atu ai tatou e rave i te mau faaotiraa i te paari.
- E faaohipa Iehova i ta 'na mau melahi no te tauturu ia tatou.—Heb. 1:14.
- E faaohipa Iehova i to tatou mau taeae e tuahine no te tauturu ia tatou. E nehenehe ratou e haapuai mai ma ta ratou e parau e e rave.—Kol. 4:11. Eaha ia ta tatou i haapii mai i te mau parau a Paulo i roto i te Korinetia 1, 10:13? Eita Iehova e maiti eaha te mau tamataraa ta tatou e faaruru. Ia papu râ ia tatou e ia tiaturi tatou ia Iehova, e nehenehe e faaruru i te mau tamataraa atoa. Ua ite tatou e e faaora iho â Iehova ia tatou, ia nehenehe tatou e vai taiva ore ia 'na.



E rave mai i teie vea e te tahi atu mau papai ma te tamoni ore



E taio atoa i te Traduction du monde nouveau i nia i tera reni

A hi'o i nia [www.jw.org/ty](http://www.jw.org/ty) aore ra a faaohipa i teie hoho'a



w17.02-TH  
161103